

*Check instance Profiles for more details

24/7 Customer Care: Call 1-45 6789 or www.tellingong.com.sg

TELE Apdeit

Citifon Namba 1 Bonde!

Citifon bai makim namba wan anivesari bilong em dispela Sande, Me 27, 2012 na long selebretim dispela bonde bilong em, olgeta Citifon kastoma bai kisim K1.00 fri kredit, na sampela laki kastoma bai amamas tru taim ol i kisim sampela ol prais i stap.

Antap long K1.00 fri kredit we bai go aut long olgeta Citifon kastoma long Fraide, Me 25, ol arapela bikpela prais em:

**Mekim Kol namel long 23 na 31 Me, na yu ken winim 1 yia Fri Kredit long wanpela dro wantaim 3-pela arapela wina long kisim K100 olgeta mun.*

Moa kol yu mekim, moa sans yu bai gat long win; * Olgeta top-ap long Citifon, Fiks Waiales Fon na Data, bai go insait long Me dro bilong Dream Car Promosen; na

*FM 100 bai mekim 10-pela Kes Kol long Sande, Me 27, na sampela laki Citifon yusa i mas ansa wantaim 'Yello' long winim K1000. Em nau, 10-pela wina bai kisim K1000 wanwan long dispela Kes Kol promosen.

Ol Praud
Papua Niugini
Manmeri...
Save tok YELLO
wantaim...



Ringim 24/7 Kastoma
Kea long 345 6789 wan-
pela prodak bilong

TELKOM PNG LIMITED



Callcenter Call at 345 4789

O'Neill: Mi Praim Minista yet

Aja Alex Potabe i raitim

MEMBA bilong lalibu-Pangia, Peter O'Neill, i tok em i stap praim minista yet, maski Suprim Kot i mekim disisen long Mande olsem O'Neill-Namah gavman i no bin bi-hainim loa long kamapim nupela gavman gen long Disemba 12 las yia.

Suprim Kot i painimaut olsem Sir Michael Somare em i tru tru praim minista bihain long Sif Jastis Sir Salamo Injia, Jastis Nicholas Kirriwom na Jas Las Gavara-Nanu i bin givimaut disisen long sapotim Sir Michael agensim Deputi Sif Jastis Gibbs Salika na Jastis Bernard Sakora, husat i tok O'Neill em i tru tru praim minista.

Dispela Suprim Kot Refrens namba 1 na 2 bilong 2012 (SCR 1& 2 of 2012) i bin painimaut sapos gavman bilong

O'Neill em i tru tru gavman o lejitimet gavman aninit long Mama Loa bilong kantri.

Atoni Jeneral bilong O'Neill gavman, Dokta Allan Marat i bin askim kot long sekim na painimaut, aninit long dispela tupela refrens, sapos gavman bilong O'Neill em i tru tru gavman aninit long loa.

Tasol bihain long kot i painimaut long Mande olsem Gren Sif Sir Michael Somare i tru tru praim minista, O'Neill wantaim ol gavman minista na memba bilong en i strong yet olsem ol bai nonap bihainim o harim disisen bilong kot bikos dispela disisen i no stret.

"Bai mipela nonap bihainim dispela disisen bilong kot bikos dispela disisen i no stret. Sir Salamo Injia em i gat planti asua agensim em. Jastis Nicholas Kirriwom tu em i laik pait agensim gavman.

"Dispela i bagarapim

gutpela nem bilong kot sistem na judisiari bilong kantri. Olsem na Sir Salamo, Jastis Kirriwom na Jastis Gavara-Nanu i mas lusim wok bikos ol i no sanap stret long mekim gutpela na stret-pela disisen bilong gutpela bilong dispela kantri," O'Neill i tok.

O'Neill i tok gavman i tokim polis long mekim wok painimaut i go insait long Sir Salamo na Jastis Kirriwom bikos tupela i asua.

"Olsem na palamen i sindaun gen long stretim dispela asua. Dispela asua na disisen bilong kot i ken bagarapim kantri, taim mipela i go insait long ileksen.

Gavana-Jeneral Sir Micahel Ogio i sainim ol pepa long larim palamen i sindaun gen long Tunde moning.

O'Neill i bin go long palamen tasol 17-pela memba tasol i bin stap bikos planti ol memba i mekim ol nominesen yet



O'NEILL-NAMAH GAVMAN... Moa long 17-pela memba na minista bilong O'Neill-Namah gavman i strongim sait long luksave long Peter O'Neill olsem praim minista na les long bihainim disisen bilong Suprim Kot. *Poto: Nicky Bernard*

long wan-wan ilektoret bilong ol.

Wankain taim, Gren Sif Sir Michael Somare i laik kamapim nupela keteka gavman long gavman haus long Tunde, tasol ol ami na polis i bin lokim get i stap taim em i bin kamap long hap long 2:30 apinun.

Sir Michael i tokim NBC redio olsem em i nau praim minista na rijinel memba bilong Is Sepik bihain long Suprim Kot i mekim dispela disisen long putim em gen olsem praim minista bilong kantri.

PNGDF na Woks Dipatmen stretim Hailans Haiwe

Aja Alex Potabe i raitim

HAILANS Haiwe em i 1-pela namba wan rot insait long kantri bikos em i save sevim laip bilong hap populesen na save kamapim ol bisnis long groim ikonomi bilong bilong kantri.

Dispela namba wan rot inap long bagarap i go karangi stret bikos bipo gavman na tu ol memba na lida i no save luksave long en.

Tasol nau PNG LNG Projek em i luksave long stretim dispela rot long larim ol manmeri i kisim sevis, bisnis i kamap na stretim laip bilong pipel husat i save yusim dispela rot.

Tasol nau, aninit long lukluk bilong Woks Minista, Francis Awesa, Woks Dipatmen na PNG Difens Fos ami i wok-

bung wantaim long mekim ol liklik wok mentenens tasol long larim dispela haiwe i stap gut, na manmeri i ken kisim sevis.

Aninit long 1-pela Memoandum ov Agrimen (MoA) wantaim PNGDF Enjinia Batalion long Igam Barracks, Lae na Woks Dipatmen, ol ami na wokman bilong woks dipatmen i nau wok long stretim ol bagarap rot namel long Mendi na Tari seksen bilong Hailans Haiwe.

Sinia Projek Enjinia bilong Woks Dipatmen, Michael Edmond, i tok dispela em i namba wan taim ol i traime tasol bihain long ol i bin sainim dispela MoA.

"Em i 3-pela mun tasol na mipela i mekim ol liklik wok mentenens long Kaupena nau. Dispela seksen bilong haiwe em i bagarap stret,

tasol mipela tok tenkyu long PNG LNG Projek bikos ol i luksave wantaim fanding bilong dispela projek," Edmond i tok.

PNGDF Patrol Komanda bilong Enjinia Batalion(L), Koporal Andrew Foieke, i tok 20-pela PNGDF enjinia i nau stap long Nipa long mekim dispela wok.

"6-pela i nau stap long Hela, we 2-pela i stretim Alua Bris. 14-pela i wok long Sauten Hailans seksen bilong haiwe, we 7-pela bilong dispela i stap long Tindom Hill long Poroma.

"Mipela i halivim ol kar, pipel na kampani husat i save yusim dispela rot. Wok bilong mipela em long larim dispela haiwe i stap gut long yumi olgeta i ken kisim benefit," Koporal Foieke i tok.



STRETIM HAIWE...PNGDF Patrol Komanda (L), Koporal Andrew Foieke na enjinia Michael Edmond (R) i nau wok stap long Kaupena seksen bilong Hailans Haiwe long Sauten Hailans. *Poto: Aja Alex Potabe*

Kalang Advertising Limited
2nd Floor, Telekom Technology Building, 4 Mile DOROKO, WCD
P.O.Box 1534, Port Moresby, PNG

OFFICE TELEPHONE: 300 4300 FAX: 300 4316

FM100
PNG'S Information and Music Leader

Nogat wan- pela man bai stopim Ileksen 2012

Aja Alex Potabe i raitim

ILEKSEN 2012 bai bi-
hainim taim stret na bai go
het maski palamen i sin-
daun gen na Suprim Kot i
kamapim Gren Sif Sir
Michael Somare olsem
praim minista.

Peter O'Neill, husat i tok
em i stap praim minista
yet wantaim sapot bilong
moa long 90 memba,
polisman, ami, pablik
sevan na pipel bilong
klantri, i tok Suprim Kot
aninit long was bilong Sif
Jastis Sir Salamo Injia, i
ting ting long kamapim in-
stabiliti na bagarapim
kantri taim ileksen i laik
kamap.

O'Neill i tokim moa long
7,000 pipel bilong lalibu-
Pangia long Mande taim
ol i mekim nominesen bi-
long en long Pangia ste-
sen olsem gavman bilong
en i nogat wanpela ting
ting long holim pawa yet,
tasol ol i laik stretim dis-
pela asua Suprim Kot i
kamapim lon bagarapim
kantri.

"Tasol mipela bai nonap
stopim ileksen. Ol

kendidet husat bai sanap
i ken mekim kempein.
Mipela bai stap yet long
palamen inap ol rit pepa
bilong ileksen i kam bek
long han bilong Ilektoral
Komisin, na nupela gav-
man i kamap.

"Nogat wanpela man i
laik stopim ileksen. Gav-
man bilong mi i sapotim
Ilektoral Komisin long
karimaut fri, fea na seif
ileksen long larim olgeta
manmeri long kantri i luk-
save long rait bilong ol
long vot wanpela taim
tasol insait olgeta 5-pela
yia, O'Neill i tok.

Wankain taim Ilektoral
Komisina Andrew Trawen
i tokim NBC radio tokbek
so olsem em i stretim
pinis ol plen long ronim
dispela ileksen.

Trawen i tok Ilektoral
Komisin i redi pinis long
larim ileksen go het bihain
long gavana jeneral, Sir
Michael Ogio i sainim ol rit
pep alas wik Fraide.

Em i tok nominesen bai
pas tete long 4-kilok api-
nun na poling bai stat long
23 Jun long nupela Hela
Provins pastaim.



Andrew Trawen



Peter O'Neill

THE LARGEST CASH GIVEAWAY IN PNG'S HISTORY

COMING SOON

So Get Ready!

Find Us On



www.bsp.com.pg

Refer to our website for full Terms & Conditions.

Niupela

Maggi

Magic Teist

Wanpela kain kuing pauda

Bai givim
BEST teist
long
kainkain kuk

“Peim mipela pastaim na kisim vot” Madang lain tok

PLANTI manmeri long Madang eben lokal level gavman (MULLG) i tokaut pinis long tingting bilong ol olsem ol kendidet mas peim ‘kes mani’ long ol pastaim na bai ol i givim vot bilong ol.

Madang eben i karamapim ol manmeri husat i stap insait long taun stat long Sisiak i go olsem long Niu Taun, Nabasa na long Kalibobo na tu em i

karamapim ol bikpela setelmen insait long taun.

Ol bikpela setelmen insait long taun eria em Humade, Sisiak, Bukbuk, Wagol, Bilia mausrot, Kerema Kompaun, DCA poin, Gav Stoa na Karkar kompaun.

Insait long wanpela redio intaviu wantaim NBC Redio Madang, planti ol lain insait long Madang eben i tokaut olsem husat kendideit i laik

go long ol eria long mekim kempein bilong ol i mas redim ol yet gut na go.

“Yu man yu laik sanap resis long ileksen 2012 long Madang, yu mas redi long givim mipela kes-mani pastaim na mipela bai votim yu,” wanpela meri i tok long NBC Redio Madang taim ol nius lain i toktok long em.

Meri i tok olsem long nau yet insait long Madang taun

planti ol sevises i bagarap na nogat lida i stap long stretim. Ol yangpela manmeri o yuts i wok long kirapim ol sampela program bilong ol na nidim sapot bilong ol memba, tasol nogat memba i stap long sapotim ol.

Narapela man husat i givim tingting bilong em tu i tok olsem Madang nau i pulap strong long pot-hol o baret long taun rot, na

nogat lain i stretim na planti ol samting i bagarap na nem bilong Madang i pundaun pinis.

Olsem na man ya wantaim ol arapela long ol setelmen long Madang i pasim tok pinis olsem husat lida i laik go kempein long eria bilong ol mas givim kes-mani pastaim.

Narapela meri long Madang i tok tu olsem ol lida bilong Madang i save

go hait stret taim ol i win long ileksen. Ol i no save go bek long ples na liklik eria we ol pipel i votim ol na bringim sevises. Ol i save stap tasol long Mosbi na salim ol ejen o wok man bilong ol tasol i go kam long Madang. Dispela pasin i mas stop nau, olsem na ol manmeri long Madang eben i tok olsem “Peim Mipela pastaim na mipela bai votim yu”.

Polis trefik loa pundaun long nominesen taim

DISPELA ol poto i soim planti samting i no stret long loa bilong trefik na rot sefti long taim bilong ileksen. Na trefik lain o polis i stap we?

Tupela kar ya i karim ol man husat i no sindaun gut. Sampela i hangamap tasol olsem monki o Tazan long muvi piksa.

Dispela poto em *Wantok* i kisim long Madang, tasol wankain hevi i kamap long planti ples na taun insait long PNG.

Em i soim olsem long taim bilong ileksen, planti trefik loa bilong polis bai bruk na ol sapota bilong ol kendidet bai wokim samting long laik bilong ol yet.

Ol sapota bilong ol kenideit i brukim planti lo bilong trefik tasol polis i no holim ol na sasim ol.

Long taim rit o taim ol i makim long ol kenideit i rejista long vot i bin op long

las wik Fraide i kam inap nau, planti ol lo bilong polis trefik long Madang provins i pundaun olgeta.

Wanpela komyuniti lida bilong Madang, Peter Saun i tok olsem long las wik bipo long rit i bin open, trefik polis i bin bukim em long Tusbab nambis bikos wanpela taia long kar bilong em i bagarap liklik. Em i harim tok tasol na peim fain long asua bilong em.

Tasol long aste, em i bel nogut tru long lukim ol kar na bas i pulap tru na winim mak bilong namba bilong pipel ol i ken karim na ron i go olsem long taun long bringim ol kendideit long nominet.

Saun i no amamas tru long polis bikos ol i no mekim wok bilong ol long kontrolim ol trefik i go insait long Madang taun.

Em i tok planti bikpela

trak, PMV trak na tu ol bas i pas pas tru na turangu ol wokman manmeri bilong gavman na ol bisnis haus long Madang i painim hat stret.

Saun i tok ol sapota bilong ol kenideit husat i resis long Madang Open na Rijinol Sia i mekim kain kain stail stret na i brukim tru polis trefis lo. Tasol ol trefik polis bilong Madang i no mekim wanpela samting. Ol i sanap tasol na lukluk.

“Mi guria tru long lukim wanpela polis i sanap tasol na mangalim ol yangpela man i kalap kalap olsem monki o Tazan antap long ruf bilong wanpela trak,

“Sampela trak tu i pulap stret winim mak na ron long rot wantaim ol sapota bilong ol kenideit tasol, ol trefik polis i no mekim wanpela samting o sasim ol draiva,” Saun i tok.



POLIS WE? Poto ya i soim stret olsem ol lain ya i brukim trefik lo tasol polis i no sasim ol.

Ol piksa bilong nominesen wik...



Namah nominet.



Janet Sape nominet



Philip Ame nominet



Loani Henao nominet.



Rex Tawian nominet

I no narapela, O'Neill tasol

Aja Alex Potabe i raitim

MEMBA bilong lalibu-Pangia, Peter O'Neill em i wanpela hotpela kendidet tasol husat i gat bikipela sans long mekim nem nau long dispela ileksen bikos ol pipel bilong en long lalibu-Pangia yet i les long narapela man i kamap lida bilong ol.

Moa long 7, 000 pipel i bin wetim O'Neill long kamap long mekim nominesen bilong en long Pangia, Sauten Hailans Provins long Mande.

Amamas bilong ol long tok welkam na singaut long soim sapot long O'Neill i ples kliia soim olsem ol arapela 15-pela kendidet long lalibu-Pangia i nogat sans moa long rausim sia bilong O'Neill.

Taim O'Neill i kam daun long helikopta wantaim Siaman bilong Hela Trensisenal Atoriti na Memba bilong Tari-Pori, James Marape, Woks Minista na Memba bilong Imbonggu, Francis Awesa, Pipols Nesenel Kongres Pati (PNC) Presiden, Simon Korua, na sampela ol biknem lida bilong Sauten Hailans, ol pipel i amamas na singaut strong long

soim sapot bilong ol long O'Neill.

O'Neill i tok em i tok kantri luksave long lidasip kwaliti bilong en, na pipel bilong lalibu-Pangia, Sauten Hailans na PNG i noken paul na votim ol arapela man husat i ken bagarapi mkantri.

"Kantri i luksave long yupela makim mi kamap lida bilong yupela. Nau i kambek long yupela yet bai lukim na mi bai sainim ol nominesen pepa long ron long ileksen na kisim bek sia bilong mi," em i tok.

Bipo Memba bilong lalibu-Pangia, na long taim politikel birua bilong O'Neill, Roy Yaki, i tok em bai nonap sanap long dispela ileksen bikos taim kantri i gat bikipela bilip long O'Neill olsem trupela lida, i no gutpela long em i sanap.

"Mipela lalibu i sanap baksait long O'Neill. Mipela les long votim wanpela man. Em O'Neill tasol nau," Yaki i tok.

Ol arapela kaunsil presiden na lokol lida tu i makimmaus bilong pipel na tokim O'Neill long go mekim kempein long sapotim ol kendidet bilong PNC Pati long arapela hap bikos lalibu-Pangia em i nating tru bilong en.



MI TASOL...Peter O'Neill i tromoi han long ol pipel bilong en long Pangia taim em i laik mekim nominesen bilong en olsem wanpela kendidet long sanap long lalibu-Pangia ilektoret. Foto: Aja Alex Potabe



STAP PINIS: Posta bilong kendidet Brian Kramer em namba wan long sanap long bikipela rot i go insait long Madang taun.



RON LUSIM: Ol sapota bilong siting Memba bilong Madang, Buka Goli Malai i ron long hapsait rot na ol sapota bilong narapela kendidet i ron long hapsait long wanpela bikipela rot long Madang.

Ilekse fiva mekim Madang taun rot pas tru

WANPELA yangpela lida husat i save go pas long Yut-Link Progem long Madang em wanpela long namba wan lain long nomineit long las Sarere long resis long Madang Open sia.

Dispela man em Brian Kramer, husat famili bilong em i stap longpela taim tru long Madang na dispela yangpela man tu i mekim skul bilong em long Madang long Divain Wod Yunivesiti na tu makim Madang long pilai long Junia Kumuls agensim Australia.

Kramer em namba wan tru long putim bikipela posta bilong em long bikipela rot i go insait long Madang taun nau i stap arere long Modilon Haus sik.

Em i rejista long resis wantaim arapela tupela lain em foma Madang MP, Jacob Wama wantaim foma siaman bilong Kurumbukari Lenona Asos-esin, Toby Bare.

Long aste (Trinde) siting memba bilong Madang, Buka Goli Malai i go pas long bringim bikipela lain kar na ol sapota bilong em taim em i go nomineit.

Ol arapela lain husat i nomineit long aste tu em meya bilong Madang taun, Mike Kamo, narapela kenideit William Banjoy na tu forma Madang memba na bisnisman Stanley Pil.

Wanpela bikipela rot i go

insait long Madang taun i pas pas tru long ol kar na bas we i karim ol sapota bilong ol kenidet long go long nomineit.

Long resis bilong Madang Open i lukim 40-pela lain olgeta i putim nem long resis na em bai wanpela hatpela resis tru long kisim namba long taim bilong ileksen o vot stret.

Ol lain husat i resis long Madang Open sit i putim nem o rejista long Madang distrik ofis na ol lain long resis long Madang Rijnol sia i rejista o putim nominesen bilong ol long Iektrol Ofis long Madang taun.

Stat long las Sarere bihain long rits i bin open, ol lain siting kenideit husat i nomineit o rejista pinis long resis em John Hickey long Bogia Open, Ben Semri long Midel Ramu na tu Sir Arnold Amet long Madang Rijnol sia.

Sir Arnold i bin nomineit long resis long fran bilong Gren Sif, Sir Michael Somare long Sarere long Madang.

Long resis bilong Madang rijinol sit em lukim 27-pela kenidet i putim nem long resis.

Long Mande tu i lukim bikipela lain kar na bas i lusim Madang taun na ron bihainim Madang-Ramu Haiwe i go antap long Walium gavman stesen we i lukim biknem bisnis man bilong Madang Peter Charles Yama i nominet.

Sefti bilong ol tisa na sumatin i bikpela samting

STRONGPELA askim i go long ol skul tisa na ol patna long helpim daunim ol sekyuriti hevi i ken kamap long ol na moa yet, long ol sumatin long taim bilong ileksen.

Taim Eking Edukesen sekreteri, Luke Taita, i wokim

dispela singaut, em i tok olsem tu ol tisa i mas stap "niutrel" o, i sanap long namel na i no sapotim wanpela sait tasol long taim bilong dispela 2012 nesenel ileksen we i bin stap long las wik Fraide.

Mista Taita i tok sapos

wanpela tisa i soim sapot bilong em long wanpela kendidet o politikel pati, em i noken kisim skul, ol sumatin na ol narapela tisa i go insait. "Yumi stap long demokretik sosaiti we yumi ikwal aninit long loa. Na yumi gat sans long kisim ol samt-

ing i karamapim ol wok bilong g lejisletsa o loa.

"Olsem na etvais bilong mi long ol het tisa na ol siaman bilong g skul bot em long mekim samting wantaim tingting long taim bilong g ileksen," Mista Taita i tok.

Em i givim ol tok stia long

ol skul long noken yusim ol samting bilong skul long karimaut ol bung, reli na ol wok bilong kempein bilong sapotim wanpela kendidet o wanpela politikel pati i agensim narapela. Dispela em ol samting olsem ol klasrum na pilai graun bilong skul.

"Ol tisa, ol het tisa na ol skul bot siaman i mas stap niutrel long abrusim ol hevi we i ken kirap namel long ol kendidet o politikel pati," Mista Taita i tok.

Em i singaut long ol papamama long wok wantaim ol skul na helpim long daunim ol sekyuriti hevi na ol narapela birual inap kamapim hevi long ol pikinini bilong ol long taim bilong 2012 nesenel ileksen.

"Ol papamama na ol gadien i gat rait long stopim ol pikinini bilong ol long noken go long skul sapos ol i lukim olsem bai hevi na birua i kamap," Mista Taita i tok.

Em i tok ol dispela skul we ol i putim ol long nesenel geset bilong givim tok orait long ol ami, polis na Koreksenal Sevis woklain i slip long en i mas mekim olsem.

Em i tok ol toktok long dispela i stap long Sekula namba 14/2012 we Edukesen Sekreteri i givim aut pinis we i tok tok long ol rot we ol skul i mas bihainim long kisim na putim ol mani we ol sekyuriti lain bi long gavman bai slip long ol skul na tu, wok we ol tisa i mekim long dispela nesenel ileksen.

Ol sumatin bilong DWU i lukluk long ol buk long Open De long las mun

Planti sumatin tude i no save ritumas – sevei

James Kila i raitim

MASKI olsem planti nupela teknoloji long sait bilong infomesen na kompyuta na intanet i kamap, planti ipipel nsait long PNG na moa yet, ol sumatin i no save long planti infomesen long helpim save bilong ol.

Dispela em bikos planti sumatin i no save ridim ol buk tumas.

Planti save westim taim na pilai pilai long intanet na e-mail na save ol i inap kisim long ol buk em i lus nating.

Insait long wanpela sevei pepa wanpela bikpela divelopa long Madang i bin givim long ol sumatin long pulumapim i no long taim i go pinis, em i soim olsem planti ol sumatin i no save gut long rait long Inglis, na moa long en tu, planti i no save tok Inglis gut tumas.

Moa long en tu em i kamap long ples klia tru olsem long ol sevei pepa, planti ol sumatin i no klia long wanem ol bikpela divelopmen i kamap long Papua Niugini.

Bikpela as tru we ol sumatin i no save tumas long wanem ol samting i

kamap insait long ol risos sekta long PNG em bikos planti bilong ol i no save ritumas.

Wanpela sinia leksera long Yunivesiti ov Goroka, Charles Akunai, i tok olsem ol lain sumatin bilong tude i save long rit na stadi long wanem liklik eria we i stap long kos bilong ol tasol. Planti bilong ol i no save intres long rit na save gut long wanem ol bikpela samting i kamap insait long ol arapela eria bilong stadi na tu, insait long kantri na wol.

Planti ol sumatin bilong nau i no save tok Inglis stret bihain ol tok tok. Ol i save brukim bus na putim sampela Tok Pisin i go insait na planti taim paulim mining bilong ol toktok ol i mekim.

Mista Akunai i tok bikpela samting nau ol sekenderi skul na yunivesiti long kantri i mas mekim em long tokim ol sumatin long rit moa.

Long sait bilong liter-itsa, em ol sumatin i mas ritim buk na raitim ripot o mekim rivi bilong buk ol i ritim, na dispela i ken helpim ol sumatin long save tru long mining bilong wanem ol i ritim long en.

I have the Power to choose a good leader!

Your poor decisions in voting, will affect your future

Good Services...

No Services

2012 VOTE LPV

HIV AIDS

Caritas Papua New Guinea

ELECTORAL COMMISSION Papua New Guinea

PNG Electoral Support Program



**Yut, Meri na
Famili
wantaim
Lorraine
Siraba**

Stopim pasin bilang bagarapim ol pikinini olgeta de

MI HARIM long wanpela sumatin long strit bilong mipela olsem tupela bikhet man i holim ap wanpela sumatin man wantaim naip taim em i wokabaut i kam bel long skul na kisim olgeta samting long bek bilong em.

Narapela tu ol I wokim long wanpela sumatin meri we wanpela dak glas kar i bihainim em taim em i wokabaut i go bek long haus wantaim sampela manki sumatin bihain long skul i pinis. Na ol i tromoim ol toktok i no gutpela long em.

Long tupela keis, pablik i lukim, tasol nogat man i kirap na mekim samting long helpim ol dispela sumatin man na meri.

Maski yumi save olsem em i no stret long bagarapim ol meri na ol pikinini na em i wanpela hevi long ol komyuniti na kantri bilong yumi, planti meri na pikinini long kantri i save stap wantaim pret olgeta de. Moa yet, ol kraitim agensim ol pikinini i wok long kamap long olgeta de olsem bagarapim ol wantaim ol tok nogut, paitim na bagarapim ol na tu wokim ol toktok i bagarapim tingting bilong ol,

Ol dispela samting i kamap olgeta de na pipel i ting olsem i nogat rong long en. Em i kamap olsem bikos komyuniti i no wokim samting long agensim ol kain pasin bilong bagarapim na kamapim hevi long ol pikinini.

Vailens agensim ol meri i no samting bilong ol meri tasol, nogat. Ol man i ken helpim tu na ol i ken mekim dispela tai mol i toktok long ol man i wokim kain pasin long stopim dispela.

Taim planti pipel i save olsem em i rong long bagarapim na paitim nogut ol meri na pikinini, ol no save long mekim wanem long stopim dispela pasin. i moabeta nau long karimaut ol program bai helpim ol komyuniti na pablik long bihainim seif rot we komyuniti bilong ol i wanbel long en long stopim ol kain vailens.

Yumi mas promotim ol sempion long komyuniti na ol gutpela wok we ol manmeri insait long komyuniti i mekimlong givim strongpela tingting long ol narapela i ken bihainim.

Ol kriminel o man nogut i save tagetim ol skul pikinini taim ol i go na i kam bek long skul bikos ol i save olsem ol i liklik na ol i nogat strong long pait bek.

Ol skul pikinini bai ripot i go long husat taim ol trabel i kamap long ol? Yumi save olsem ol polis i no save givim helpim long lukautim sefti bilong ol, o kisim eksen long ol lain i wokim pasin i no stret long ol skul pikinini.

I moabeta long promotim helpim lain o telepon namba we ol pikinini i ken ringim na toktok long ol lain long kisim helpim, na ol seif ples we ol pikinini i bungim kain hevi i ken go lukim long kisim helpim.

I luk olsem long nau, yumi lusim tingting long ol skul pikinini na yumi no bisi long ol. Na ol i liklik samting tasol husat i nogat man long makim ol long sosaiti. Olsem n a yumi ol bikipela manmeri, ol komyuniti, ol lain i save wokim ol bikipela disisen na sosaiti i no bisi na i no mekim samting long daunim ol hevi we ol skul pikinini i save bungim long en. Dispela i soim olsem yumi no lukim ol pikinini olsem ol i bikipela samting insait long kantri bilong yumi.

Stopim vailens nau, yu na mi na olgeta na olgeta lain i mas mekim samting long agensim vailens we i kamap long ol pikinini. Na yumi n oken lukluk nating tasol.

Taim yumi feil long sanap olsem komyuniti na wokim samting long stopim vailens, yumi kamap manmeri i nogat pawa. Na yumi larim liklik lain long bosim laip bilong yumi.



Raun Lukim ol Meri na Pikinini:

OL MERI MAS MUV FOWET TU: Lidameri bilong ol meri long bisnis, Janet Sape, i toktok long opening bilong nupela hetkota opis. *Poto: Nicky Bernard*

PNG SUSTAINABLE DEVELOPMENT PROGRAM LTD

Helt sevis rot i wok strong moa bihainim Wara Flai

OLTAIM, bai mipela laik stori long ol gutpela wok-kamap (o ol samting i no ron stret, bihain long wanpela bikipela samting i kamap). Tasol nau, mi laik toktok long wanpela samting i wok long kamap na ol bikipela wok ol pipel i mekim long kamapim; ol ples manmeri, ol sios wokmanmeri, ol wokmanmeri bilong OTML, ol volantis i kam long Australia, na wanpela strongpela misinari man i stap long narapela sait bilong Solwara Pasifik.

Long 2010, mipela i kisim askim long halivim Evanjelikal Lutheran Sios long PNG Helt Sevis long sanapim wanpela nupela wod mama na ol rum-waswas long Obo, i stap long sait bilong Wara Flai. Dispela i lukim wanpela komitmen o skelim mani inap long K217,500 i kam long PNGSDP na Midel Flai Tras. Midel Flai Tras, i makim wanpela long nainpela komyuniti i sindaun insait long wok-mak bilong Ok Tedi Main. Aninit long Komyuniti Main Kontinuesen Agrimen (CMCA), wanpela kompensesen peimen i save go aut olgeta yia bilong ol developmen projek insait long ol Tras eria. PNGSDP i makim tu K21 milian olgeta yia long sapotim ol projek insait long nainpela tras eria. Olsem na PNGSDP wantaim Midel Flai Tras i tok-wanbel long givim mani long strongim ol helt sevis bilong dispela liklik komyuniti long Obo, na tu ol arapela komyuniti i stap klostu olsem Suki/flai, Aiembak, Wangawanga, na Lowa Lek Mari insait long Midel Flai Distrik.

Wantaim, mipela i kontributim K435,000 long senisim ol olpela biding. Wankain ol bikipela salens olsem bikipela Wara flai, em ol salens bilong givim wanpela projek i go long wanpela longwe wara komyuniti. I gat planti hevi long karim ol kago i go insait, na bikipela taim i lus long kisim ol biding samting i kam long Lae. Tasol, em i no pasim bilip bilong ol patna long dispela projek.

Long graun, i gat wanpela tim long ol volantis bilda na kapena bilong Mobile Mission Maintenance (MMM) Australia, wantaim sapot bilong komyuniti, i wok long mekim ol samting i kamap. Ol faundesen, pos na floring i stap pinis long tupela biding wantaim. Laspela ol samting bilong wok bai kamap long Obo long ol de i kam, na dispela bai halivim tim long graun wantaim ol samting ol i nidim bilong pinisim projek.

Wanpela long ol bikipela samting long dispela projek, em i kamap bihainim tingting na stia bilong wanpela volantis man husat i wok long haus bilong em long narapela sait bilong wol. Gene Eckhart i save stap long Seattle, Washington, USA, na i save stiaim dispela projek long kompyuta telefon bilong em, kain kain email i save go kam, ring long telepon, na ol ripot i save go oltaim long pasim olgeta liklik wok, bai projek i ron gut. Dispela em i antap long olgeta arapela salens ol i save bungim olgeta de.

Projek i laki long kisim fri lojistik sapot i kam long OTML Siping, na inap long 3,000 kilogram wesan na 4,000 kilogram karanas i kam long Curtain Brothers long Pot Mosbi.

As bilong nambawan gutpela wok kamap, em i bilip bilong ol pipel i wok long projek. Projek long Obo i wok long kamap gut bikos long hatwok bilong planti manmeri, na mi bai redi long stori long taim dispela projek i pinis, na tu, long lukim ol gutpela wok-mak i kamap long sait bilong helt sevis, ol dispela nupela biding bai bringim.

I kam inap nau, PNGSDP i givim pinis moa long K50 milian long strongim gavman na ol non gavman ejensi helt sevis insait long Western Provins. Wod mama na ol rum-waswas i wok long sanap long sait bilong Wara Flai long Obo, em i narapela piksa long we ol komyuniti i ken wok wantaim ol CMCA Tras, ol sios, na PNGSDP long kamapim senis.

CEO: David Sode

I kam long tebol bilong CEO (Article #18 of 2012)

Tel: [675] 320 3844/45 | Fax: [675] 320 3855 | Email: enquiries@pngsdp.com

Website: www.pngsdp.com



AMAMAS NA MAS: Ol meri i soim amamas na mas i go long opim nupela opis hetkota bilong PNGWiB long Waigani Draiv, Mosbi siti. **Poto: Nicky Bernard.**

Ol meri long bisnis i gat nupela hetkota opis

Veronica Hatutasi i raitim

OL MERI i gat ol liklik bisnis long dispela kantri nau i gat nupela hetkota opis bilong ol bai helpim ol sapos ol i laik kirapim wok long dispela eria na ol narapela samting i karamapim wok bisnis.

Long las wik Tunde, ol bin opim nupela hetkota opis bilong PNG Women in Business Micro Finance Institute (PNG WiBMFI) antap long Abel Computing bilding long Waigani Draiv, Mosbi siti.

Eksekutiv Dairekta bilong WiBMFI, Janet Sape, i tok em i hat long ol liklik manmeri long ol ruel eria i kisim “loan” o dinau mani long ol bikpela benk long staim ol liklik bisnis projek long ol.

Dispela em bikos oi nogat ol kain fainensel servis long ol ruel eria n a tu, ol manmeri i laik kisim dinau mani i nogat ol samting long sapotim ol long kisim dinau mani long ol benk.

Na bihain long karimaut ol awenes program, ol vaiabiliti kos, ol komyuniti projek, helt kem, ol trening long fainensel literesi na tu, putim ol meri long netwok namel long ol, tingting long ol meri i kamap papa bilong ogenaisesen i bin groa olgeta de.

“Em bin kamap wanpela ogenaisesen ol meri yet i statim na nau ol i papa long en na we ol i amamas long en.

“Long yia 2006, mipela i bin rejistaim asosiesen olsem “City Mothers Business Foundation” long makim intres long olgeta meri long PNG wantaim tingting long kamap olsem wanpela NGO bilong helpim daunim pasin bilong turangu long ol meri. Na ol i ken gat gupela bihain taim na tu, stopim pasin bilong paitim na bagarapim meri we i save mekim ol meri olsem ol i nogat strong long sosaiti.

“Tu, dispela i ken strongim ol meri long kamap ol lida, bildim awenes long helt na ol samting i karamapim ol olsem HIV na AIDS, na helt bilong ol mama na ol pikinini,” Misis Sape i tok.

Em i tok long ekspiriens bilong ol, ol i luksave olsem long daunim pasin turangu na nogat strong long ol meri, ol i mas gat ol program we bai go het long longpela taim we bai helpim ol komyuniti long kamapim gut sosel na ikonmik sait bilong ol.

“Wantaim dispela tingting, Wimen in Bisnis (WiB)I bin statim long givim aut ol dinau mani aninit long Maikro Fainens skim long 2009 olsem wanpela pilot projek. Dispela i kamapim sans bilong ol meri long mekim samting na helpim ol yet na tu, kisim luksave.

“Maski dispela Maikro Fainens s skim i liklik, ol memba bilong mipela i bin lukim em olsem wanpela bikpela samting bikos ol benk na ol narapela fainensel institusen i no save gat luksave long ol.

“Ol samting mipela i lukim i kamap long graun i mekim mipela i statim wanpela kampani em yet na dispela em, PNG WiB MFI, long givim fainensel na bisnis developmen servis i go long ol meri husat i stap turangu long ol ruel eria bilong kantri. Na ol i ken kamapim mani long lukautim ol famili na komyuniti bilong ol we i helpim kamapim gut kwaliti long laip bilong ol.

“Ekspiriens long ol narapela hap bilong wol i soim olsem ol meri i gat gupela rekot long bekim ol dinau ol i save mekim. Dispela i givim ol strongpela na gupela sans olsem maikro fainens ogenaisesen ol i statim bai ron gut,” Misis Sape, i tok.

Em i tok ol i wok nau long statim namba wan Maikro



NUPELA WEBSAIT: Opim nupela websait i putim ol meri long bisnis wanpela level i go antap. **Poto: Nicky Bernard**

Fainens benk bilong ol meri long dispela kantri.

Em i tok wantaim nupela meri Sif Eksekutiv Opisa husat i gat gupela save long wok bilong maikro fainens benk bikos long wok ekspiriens bilong em wantaim ol benk pastaim, na ol wok meri bilong ol, ol bai kisim maikro fainens s skim bilong ol meri i go long olgeta hap bilong kantri.

Bisnis meri na wanpela meri lida, Veitu Diro husat i bin skulim Misis Sape long kamap wanpela lida long spot na moa yet, long pilai netball, i bin autim bikpela tok amamas bilong em na tokim em long go fowet long wok olsem wanpela strongpela lida.

Presiden bilong Papua Hahine, Sally Mokis taim em

i tok amamas long Misis Sape, na ol meri n a ol woklain i bin tok ogenaisesen bilong em i sapotim wok we ol (Misis Sape na lain) i mekim long kisim ol meri i go fowet.

Na ol bai sapotim PNG WiB MFI na holim han na wok bung wantaim long lukim olsem developmen i kamap long sait bilong ol meri, na ol tu i ken kontribut long ol wok go het insait long ol komyuniti, provins na kantri.

Long dispela taim tu, ol bin lonsim nupela websait bilong PNG WiB long helpim ol i karimaut gut wok bilong ol.

Websait edres em long www.pngwib.com.pg. Email edres we yu ken kisim ol em, admin@pngwib.com.pg Telepon namba em, 3402500/3238424/3238564. Feks namba em 3259212.

Laikim ailan laip.

KANTRI Papua Niugini i gat ol planti liklik ailan long em.

Planti i stap longwe tru long wanpela narapela na tu, long ol bikples. Ol i stap longwe tru wantaim bikpela solwara tasol i raunim ol.

Tru, i gat helt na edukesen i stap long ol liklik ailan ya, servis bilong gavman i no save go gut long ol.

Tasol maski ol i no kisim gut ol servis o ol samting we pipel long ol bikples i save kisim, pipel long ol liklik ailan i save stap amamas.

Ol i no save wari long sefti na sekyuriti long wanem, nogat raskol pasin i stap.

Ol i amamas long go painim pis, huk, waswas,

wokim gaden, ol yangpela i pilai bal long nambis o namel bilong ples na tu, mekim ol narapela wok.

Aua Ailan i wanpela liklik ailan i stap long biksolwara namel long Manus na Is Sepik provins.

Ol narapela liklik ailan grup wantaim Aua Ailan i stap long Westen Manus Ailan em long Wuvulu, Ninigo na Hermit Ailan grup

Tude na long neks wik long dispela pes, bai yumi lukim ol meri, pikinini na ol yangpela bilong Aua Ailan i wok, pilai, go long sios na mekim ol samting we ol i save mekim long laip bilong ol olgeta de.



PILAI : Ol dispela yangpela pikinini man i amamas tasol long waswas long solwara na pilai soka long nambis i stap. **Poto: Sandra Amuru**



WOKIM PAIA STAP: Tupela yangpela meri bilong Aua Ailan i wokim paia long nambis long kukim pis antap long em. Ol i tromoim huk na kisim pis. **Poto: Sandra Amuru**

Save i Ken Helpim



Daffodil Flawa

Flawa toktok

I kam long las wik

OL flawa i smel nais i gat spes na i save stap long olgeta gaden. Tasol yu yet i ken wokim long laik bilong yu sapos yu laikim bai wanpela spes long gaden em yu planim spesel flawa yu laikim stret smel bilong em. Kain spesel gaden em long planim flawa we smel bilong em i save kamap long nait yu ken kolim long “nait smel gaden”, heb gaden, o wait gaden long planim planti ol waitpela flawa. Wanpela seksen bilong gaden em yu ken planim ol “cut flower” o ol flawa we yu katim na planim, planim ol dispela we i save gat ol kain naispela smel we yu ken kisim ol i go long haus long mekim haus i smel nais wantaim ol flawa. Tingim, sapos yu kisim ol flawa long plent olgeta taim, flawa bai karim gut. Sapos yu kisim ol flawa bilong swit pi (pea), em bai karim gut gen long sisen bilong em. Yu ken gat gaden i gat ol flawa bilong Australia wantaim ol gupela smel olsem gaden bilong flawa boronia, warel, mint bus na yukaliptus. Moa long neks wik

Wok bung long bildim kantri

Veronica Hatutasi i raitim

ASKIM i go long ol kendidet sanap long disepla ileksen, na ol lida i stap nau yet long lusim tingting long ol wan wan eria na intres ol i gat long en na wok bung long bildim kantri bilong yumi.

Hetman bilong Pot Mosbi Katolik Asdaiosis, Asbisop John Ribat, I wokim dispela askim insait long wanpela kombain lotu i bin kamap long Sioni Kami Memoriel Sios long las wik Fraide bilong dediketim o putim wok bilong statim 2012 nesenel ileksen long han bilong Bikman.

Dispela em de we llektorel Komisin i karim ol rit (writ) pepa i go long Gavana Jenerel na em bin sainim long makim taim bilong 2012 Nesenel lleksen i stat.

Em i tokim ol kendidet na ol lida tu long mekim samting long stretpela rot long wanem, pipel i lukluk long ol olsem ol rol modul na tu, rispektim ol pipel na larim ol i makim husat man ol i laikim i kamap olsem lida.

Em i tokim ol tu long yusim dispela taim bilong ileksen i karim gut kaikai.

Asbisop Ribat i askim tu

olgeta pipel long dispela kantri long pre na bai dispela ileksen bai ron gut.

“Mi askim yupela oilgeta long lukim dispela ilkeksewn olsem bikpela samting long histori bilong kantri. Go insait long em wantaim rispek na pre pasin. Yumi laik lukim PNG kamap olsem wanpela gutpela kantri na promotim olsem wanpela kantri we ol samting i ron gut. Yumi go het long pre na bihainim Mama Lo bilong yumi,” Asbisop Ribat i tok.

Em i tok dispela de i kamap bihain long planti taim bilong pipel i paul long rot we kantri i go long em, tasol Gavana Jenerel, Se Michael Ogio, bai sainim ol rit pepa long 2012 nesenel ileksen i stat we bai rausim ol dispela paul pasin.

“Dispela em i bikpela samting long histori bilong kantri na i moabeta long yumi i mekim samting wantaim rispek long wanpela narapela, na kantri bilong yumi. Bikpela samting tu em yumi harim wanem samting we Bikpela i laik tokim yumi long en. Em long, “yu no maskim mi, tasol mi makim yu long go aut na karim kaikai. Na long laikim wanpela narapela,” Asbisop Ribat, i tok.

Hagen Lutheran Yut selebretim Yut Sande.

Paulus Tali i raitim

SAMTING olsem 1,500 pipel i bin kamap long selebretim Yut Sande long Ogelbang Lutheran Misin stesen long Hagen Lutheran Distrik, Westen Hailans provins.

Ol yut bilong 13-pela Lutheran seket distrik, ol papamama na ol woklain bilong ol sios institusen i bin stap long lotu bung na ol progrem i bin kamap long dispela de.

Wokabaut bilong ol yangpela long sios progrem i save lukim gutpela taim na taim bilong em, tasol man husat i go pas olsem lida i save soim rot wantaim ol kain program bilong ol yut i save kamap long sios.

Ol bin kirapim Hagen Lutheran Distrik yut long yia 1998 na ol yut lida yet i wok long go pas long em.

Kodineta husat i go pas long ol yut nau em Peter Konga. Em i mekim wok na raun lukim ol yangpela long 13-pela Lutheran seket long wokabaut bilong ol aninit long sios we ol i mas sanap strong long em olgeta taim.

Mista Konga i save amamas long ol yut na rot ol i

save wok bung wantaim long ol sios na yut program bilong ol.

13-pela Lutheran Seket i bin soim amamas long selebretim ol Yut Sande progrem i bin kamap long Ogelbang Lutheran Misin stesen long Sande, Epril 29.

Long taim bilong lotu bilong selebretim Yut Sande de, Mista Konga i autim tok bilong God i bihainim rait bilong John long gutpela lida.

Em bin tok planti taim bung na wok bilong ol yangpela i no save kamap gut namel long ol na ol mama, ol lokol level gavman na gavman, n asua i stap long ol sios lida husat i no klia tumas long wok wantaim ol sip sip bilong ol.

Pasto bilong Hagen Distrik Gutnius Lutheran, Pasta Teng Tengdui i bin tok em i amamas long lukim ol yangpela i putim ol kain kala bilas, pilaim musik na wokim ol kain ektiviti long amamasim de bilong ol.

Em bin tok dispela em i nupela wokabaut bilong ol Hagen Distrik yut na em i amamas long stap insait long en.

Wok bung wantaim long autim Tok

... Nupela teknoloji i mekim komyunikesen go aut hariap

ASKIM i go long ol Katolik manmeri i wok long midia o komyunikesen eria long bung wantaim long save long wanpela narapela na ol bai wok gut olsem sios long autim ol infomesen i go aut long pipel.

Hetman bilong Pot Mosbi Katolik Asdaiosis, John Ribat, i tok olsem long las wik Sande, Me 20 i makim namba 46 Wol Katolik Komyunikesen De.

Namba tu Santu Misa i bin kamap long Sen Mary's Katitrel long taun i bin selebretim namba 46 Wol Katolik Komyunikesen De.

Asbisop Ribat i bin givim sotpela histori long rot we Katolik Sios long wol i bin makim dispela de.

Long yia 1963, Pop John 23 na namba tu Vatiken Kaunsel i bin makim me 20 olsem Wol Katolik Komyunikesen De bikos sios i bin lukim bikpela sainmak long Wol Woa 2 taim Amerika i bin tromoim liklik tasol strongpela atomic bomantap long Nagasaki long Japan we moa long hap milian pipel long dispela bikpela siti i bin dai long en.

Samting olsem 2,000 Katolik bisop i bin bung long namba tu Vatiken Kaunsel bung na tok orait olsem Katolik Sios na wol bai luksave long Wol Komyunikesen De.

Asbisop Ribat i tok Wok Komyunikesen de i pondaun long sem de taim sios i selebretim pestode bilong “Ascension” o de Jisas i bin go antap long heven.

Em i tok long dispela de, Jisas i bin tokim ol aposel bilong em long go aut kisim Tok o Gutnius bilong Bikpela i go

long ol manmeri long olgeta hap bilong graun.

Het tok bilong dispela de em, “Silence and Word: Path of Evangelization”

Asbisop Ribat i tok tude, bikpela senis i kamap long komyunikesen bikos long “modern technology” o ol nupela masin we i save kisim ol toktok n a piksa hariap tru long olgeta hap bilong wol.

Tasol em i tok, planti kris-mas pastaim, Katolik Sios i bin lukim ol bikpela developmen na senis bai kamap long komyunikesen na em bin makim wanpela de long yia long selebretim dispela bikpela samting we long sampela taim, yumi no save bisi long em.

Em i tok planti nupela teknoloji olsem mobail fon, Fesbuk, Twita na ol narapela i kamap na senisim pes bilong komyunikesen long kamapim ol nupela developmen hariap.

Em i tok ol dispela nupela teknoloji i wok long kisim ol toktok i go aut hariap tru, na sios tu i ken yusim long kisim Gutnius i go aut long pipel.

“Komyunikesen tude i kamap moa gutpela. Ol samting i kamap na hariap tru, nius bai go aut long radio, televisen. Fesbuk, Twita na ol narapela rot.

“Komyunikesen i bikpela samting long olgeta eria long laip bilong yumi tude. Radio, televisen, telepon na nius-pepa em ol rot bilong komyunikesen we i ken helpim yumi long kamapim gut laip na sindaun bilong yumi, o bagarapim,” Asbisop Ribat i tok.



Taim bilong luksave long ol asua

LONG ol yia i go pinis i kam inap las yia na hap yia 2012, yumi bungim pinis ol kain hevi we yumi no bin bungim long laip taim bilong yumi.

Yumi lukim pasin stil i go bikpela, pasin wantok sistem i stap pinis long sistem, pasin bilong gridi o selpis na prait i go bikpela, pasin bilong abius, bia na smok nogut i kisim ples pinis insait long ol taun siti na bikples yumi sidaun long em. Pasin pamuk na sik AIDS i go bikpela.

Hamas yia i go pinis, Australia na planti ol arapela kantri i bin givim ol bikpela helpim mani long stretim na sindaunim gut PNG, tasol nogat gutpela kaikai i save kamap. Dispela ol bikpela mani i go long holim ol wok awenes long HIV na AIDS long stopim pasin pamuk tasol i stap yet, long stopim wok bilong dring bia na simukim smuk nogut i stap yet; long stopim pasin bilong abiusim ol pikinini na ol meri i no pinis tasol i stap yet. Na planti moa ol kain hevi i stap yet long PNG. I gutpela yumi pipel i mas sindaun na glasim yumi yet na ol dispela hevi i kamap olsem wanem. Em nau sapos yumi glasim na skelim mani i kam i go we, em yumi no save.

Em nau, ol manmeri bilong yumi long PNG, God i givim yumi wanpela golden o gutpela sans stret long dispela taim long yumi skelim tingting long glasim ol asua bilong yumi. Sapos yumi krangi long dispela golden sans, sori tru em bai kisim yumi 5-pela moa yia long bungim dispela sans.

Olsem na yumi mas skelim gut man husat bai makim maus bilong yumi long palamen long narapela 5-pela yia.

Tingim, pawa em yumi holim na sapos yumi krangi long sindaun bilong yumi, sapos yumi krangi, yumi noken komplek long God long ol hevi bai kamap long narapela 5- yia. Dispela em long wanem, gutpela sans stret God i givim yumi em yumi mas glasim na skelim tingting bilong yumi gut. Na makim ol gutpela lida long kamapim gutpela lidasip bilong daunim ol hevi nau yumi bungim. Sapos yumi krangi, yumi yet nau; skel skelim na glasim em yumi yet.

SVD Bomana Kolis i selebretim Silva Jubili

Pater Paul Liwun SVD i raitim

LAS Sande i bin lukim ol SVD komyuniti long Divain Word College Bomana, ausait long Mosbi siti i stap insait long selebresen na misa lotu we i lukim Bruder Rajesh Kulu SVD bilong India (hankais) na Pater George Ryfa SVD bilong

Poland (han sut) i makim silva jubili bilong ol. Tupela inapim 25 krismas nau olsem ol SVD misinari long karimaut mekim wok bilong Bikpela.

Liklik haus lotu bilong ol SVDi bin pulap tru wantaim ol pren bilong tupela, planti lain sista na ol seminari tu i pulapim haus lotu stret we 19 Pater i bin wokim misa

wantaim.

Pater Joseph Maciolek SVD husat i mekim lgat 19 Pater i bin stap wokim misa wantaim, wok painimaut long laip stori bilong tupela i bin stori long laip na skul na olsem wanem tupela i laik kamap misinari bilong lain SVD.

Santu misa i bin kamap naispela tru wantaim gut-

pela singsing bilong SVD ol lain seminari. Olgeta i kam long dispela lotu bilong tok tenkyu long God long singautim tupela i kam long PNG long mekim wok misinari, na long planti gutpela wok tupela i bin wokim insait long dispela kantri. Olgeta i amamasim tupela long dispela spesel de bilong ol.



Ol pater i bin bung wantaim na wokim santu misa bilong Silva Jubili long Bomana. Potos : Pater Paul Liwun SVD

Rajesh Kulu SVD bilong India (hankais) na Pater George Ryfa SVD bilong Poland (han sut)

ENB i redi long vot

Michael Novingu i raitim

SAMTING olsem 200 kendidet husat bai resis long faivpela sia long Is Nu Briten wantaim ol sapotas bilong ol i kam bung long Katolik Sios haus kibung long Vunapope, Kokopo i no long taim i go pinis long kisim stia toktok long bihainim long taim bilong ileksen.

Tupela save man bilong wok long ileksen long Papua Niugini Dokta Henry Okole na Dokta Alphonse Gelu i stap long dispela kibung long toktok long ol kendidet long bihainim stret-pela pasin long taim bilong ileksen.

Bosman bilong ileksen stia komiti long ENB Clement Irasua i opim dispela kibung na tok amamas long ol kendidet wantaim ol sapotas bilong ol long kamap long dispela kibung. Irasua I tok, dispela em namba wan taim long ENB long holim dispela kain kibung long givim stia tok long ol kendidet. Em i tok ENB provinsol gavman yet i fandim dispela kibung.

Long dispela kibung bosman bilong Iektoral Komisin long ENB Terence Hetinu i tokaut long ol kendidet na sapotas olsem Me 18, 2012 bai rit o tok orait long kempen bai stat na pinis long 22 Jun, 2012. Long 23 Jun, 2012 em taim bilong vot bai stat i go pinis long 6 Julai, 2012. Tripela wik, em taim bilong kaunim ol vot stat long 6 Julai i go pinis long 27 Julai, 2012.

Hetinu i tokaut tu olsem long ENB, ol disebol manmeri bai vot, dispela em i nambawan taim long ol disebol i vot long ENB.

Hetinu i tokaut olsem tupela meri i putim han i go antap long resis long 2012 ileksen. Rosemary Sovek bai salensim Atoni Jeneral Na Jastis Minista Dokta Allan Marat long Rabaul Open na narapela meri bai salensim Malakai Tadar long Gesel Open sia.

Em i tok mani plen bilong ENB ileksen long 2012 em 1.4 milien kina em i givim i go long Iektorel Komisin Opis, tasol ol i givim em hap mani tasol long ronim wok bilong ileksen long 2012.

Hetinu i tokim kibung olsem ol kendidet bai resis long faivpela sia long ENB i sanap olsem;

1. **Kokopo Open - 20**
2. **Gesel Open - 13**
3. **Pomio Open - 7**
4. **Rabaul Open - 5**
5. **ENB Rijinel - 7**

Em i tok dispela namba bai go antap taim rit i open long 18 Me, 2012. I gat 18-pela LLG long

ENB na 386 wod we mipela i kisim nem bilong ol manmeri i go insait pinis long Komon Rol buk salim i go long mosbi. Pastaim long mipela i salim i go long Mosbi, mipela sekim gut ol samting i stret, bihain mipela i salim i go, Hetinu i tok.

Hetinu i tokim kibung olsem long 2007, 174,664 manmeri i vot long ileksen. Mipela i rausim 27,740 nem bilong ol manmeri long Komon Rol buk bikos sampela i dai, na sampela i no stap long Is Nu Briten.

Moa yet, em i tok; 146,925 manmeri nem bilong ol i stap long Komon Rol buk bai vot long 2012 ileksen. Em i tok, mipela i salim i go long Mosbi. Sapos Mosbi i asua long wok bilong ol bai lukim namba bilong mipela i go daun.

Hetinu i tokaut olsem i gat 478 hap bilong vot, 96-pela poling tim, 460 em ol woklain long taim bilong vot, 192 polismanmeri long providim sekuriti long taim bilong ileksen. Ol samting bai mipela

yusim long taim bilong ileksen long helpim wok bilong mipela em, 97-pela kar, 31 bot, wanpela kelikopta, 460 wokmanmeri, 240 woklain bilong kandim vot, 300 polismanmeri, na wapela sip bilong ol nevi o ami, Hetinu i tok.

Moa yet ol hap bilong kauntim vot long Is Nu Briten em:

Rabaul Open - Malaguna Teknikel Koles
Gesel Open - Kairak Senta Kokopo Open - Rabaul Atsdioses Vunapope
ENB Rijinol - Ulapia Semeneri Koles

Dokta Henry Okole husat i gat bikpela save long wok bilong ileksen i tokim kibung olsem sapos yu kamap memba bilong palamen, yu wantaim nesinel gavman, provinsol gavman, LLG na komyuniti long kisim sevis i go long ol.

Dokta Okole i tok, dispela ileksen yumi mas kamapim senis long lo bilong kantri bikos lo yumi

bihainim ol waitman lo yumi kisim kam na bihainim i no stret, lo ya ol i raitim long 1970.

Em i tok, gavman i asua pinis, we yumi harim wanem samting i wok long kamap 9-pela mun i go pinis.

Taim yu win na go long palamen bikos pipel i givim yu pawa long go long palamen, yu mas respektim ol pipel, wok wantaim ol, kisim sevis i go long ol long kirapim gutpela sindaun bilong ol long komuniti bilong ol, Dokta Okole i tok.

Dokta Okole i tokim kibung olsem long Papua Niugini ol lidaman long komuniti ol pipel i luksave long ol, na ol lidaman pipel i votim ol long go long palamen



nogat luksave long ol.

Em i askim ol manmeri long skelim tingting gut pastaim vot long kendidet i gat save bai win, go long palamen wokim wok bilong yu long stretim sindaun bilong yu.

Maski, yu nogat save, lo i tok, yu gat rait long resis long ileksen, em rait bilong yu, Okole i tok.

Dokta Alphonse Gelu i tokim kibung olsem i gat 46-pela politikel pati i rejista pinis long resis long 2012 ileksen. Em i tok, sampela bilong ol dispela politikel pati i gat hevi pinis, mipela gat nid long stretim.

Em i tokim ol kendidet olsem lo i senis pinis, sapos yu win long wanpela politikel pati, yu gat rait long kalap na joinim arapela politikel pati.

Sapos yu win long ileksen yu mas toksave long opis bilong politikel pati long amas moni, ol

samting ol arapela man i givim yu long taim bilong ileksen, dispela i mas kamap 3-pela mun taim yu stap long palamen, Dokta Gelu i tok.

Dokta Gelu i tok, ol mani yu kisim taim yu kamap memba bilong palamen, em i no moni bilong yu, nogat em moni bilong ol pipel yusim long trupela stret-pela rot long kisim sevis i go long ol. Moa yet sapos yu yusim pablik moni long i no stretpela rot i gat taim bai ol i painimaut bai ol i sanap long kot.

Wanpela intending kendidet i askim sapos ol LLG presiden i laik resis long 2012 ileksen, em i mas pinis long wok, noken yusim pablik opis long kempen. Dokta Gelu i bekim olsem nogat lo i stopim ol long yusim ol samting bilnog gavman, tasol ol i mas respektim pablik samting na noken yusim long taim bilong kempen.

Rosemary Sovek, husat bai salensim Atoni Jeneral na Jastis Minista Dokta Allan Marat long Rabaul Open i tokim kibung olsem, mipela ol meri i pilim pen pinis, inap em i nap mipela i laikim senis long komuniti bilong mipela.

Sovek i tokim kibung olsem ol man i mas luksave long ol meri, givim sans long ol bai ol kamap memba bilong palamen long kisim sevis i go long ol manmeri. Em i tok, nau yet, nogat gavman sevis i go daun long ol manmeri long ples i kisim taim nogut.

Ol hausik i bagarap, nogat wara, marasin, skul i bruk, rot long Rabaul Distrik i bagarap na nogat sevis ol pipel i kisim, Sovek I tok.

Sovek i tok, ol woklain bilong gavman long Rabaul Distrik i no wokim wok bilong ol long helpim sindaun bilong ol pipel long komuniti bilong ol, nogat ol i tingim sindaun bilong ol yet na famili bilong ol.

Em i askim ol manmeri long lukluk, skelim gut na vot long gutpela kendidet husat bai wok bung wantaim ol pipel long kisim sevis i go long ol long kirapim gutpela sindaun bilong ol long komuniti bilong ol.

Em i tok, givim sans long

mipela ol meri bai yu lukim mipela bai wokim samting stret long inapim laik na tingting bilong yu.

Polis Komisina Tom Kulunga bin stap long Kokopo las wik i tokim wanpela midia konfrens olsem moa long 7,000 polismanmeri bai wokbung wantaim ol Difens soldia, CIS long provaidim sekuriti long taim bilong ileksen long Papua Niugini.

Kulunga i tok, samting olsem 380 woklain long CIS, 900 Difens soldia bai helpim polis long provaidim sekuriti long kantri long taim bilong ileksen. Em i tok, lukaut olsem sapos yu husat manmeri i laik bagarapim ileksen ol sekuriti fos bai holim pasim yu, givim yu strongpela mekimsave.

Long ol man i yusim gan long ileksen, ol wokmanmeri bilong em i karimaut wok painimaut long stopim, holimpasim ol na givim ol mekimsave. Kulunga i tok, ol PPC long provins long kantri i wok redi long ol wok plen bilong ol long karimaut wok bilong ileksen. Sapos wok ples i no stret, bai mipela i senisim na wokim nupela.

Long wankain taim, bosman bilong Polis long Niugini Ailan Rijn, Anthon Billie i tokaut olsem NGI i redi long karimaut wok bilong 2012 ileksen go het. Billie i tokaut olsem Koman Senta long NGI bai stap long Ralum long Kokopo. Mipela bai i wok bung wantaim ol arapela senta long NGI.

Em i tok, 1300 polismanmeri i redi long karimaut wok long provaidim sekuriti long ol manmeri long taim bilong ileksen. Moa yet em i tok 20-pela polismanmeri long Riot Skwat i sten-bai sapos mipela nidim helpim, ol bai helpim mipela.

Billie i tok, wanpela Nevi bot na helikopta bai helpim mipela long karimaut wok bilong mipela. Em i tok, ol ripot i kam long Kimbe long ol man i redim gan na rapela samting long pait long taim bilong ileksen, ol wokmanmeri bilong em i karimaut wok painimaut sapos i tru mipela bai stopim, holimpasim ol na givim ol bikpela mekimsave long ol.

Billie i tok, polis long Niugini Ailan Rijn i redi long wokbung wantaim ol arapela lain long lukim ileksen 2012 bai kamap seif, fri long ol manmeri votim ol kendidet bilong ol long go long palamen long makim maus bilong ol long kisim sevis i go long ol komuniti bilong ol.

Polis i no larim Sir Michael Somare long go insait long Gavman Haus

I GAT planti toktok i go kam long wok politiks insait long Papua Niugini, bihain long polis i bin pasim olupela praim minista, Sir Michael Somare, long go insait long banis bilong Gavana Jeneral. PNG niusman, Liam Fox, i ripot Sir Michael na lain sapota bilong en i bin kamap long gavman haus, we ol i bin ting Gavana Jeneral bai makim em olsem lida bilong 'kete-ka gavman'.

Tasol taim ol i kamap, samting olsem 30 polisman i bin tokim em olsem bai ol i no go insait long banis bilong Gavman Haus.

Man husat i bin Atoni Jeneral bipo, Sir Arnold Amet, i tok orait bai ol i bihainim ol 'protokol', we i we ol i mas raitim wanpela askim i go long gavana jeneral.

Long Mande nait, Suprim Kot i bin pasim tok long namba wan kot disisen bilong ol, olsem Peter O'Neill, husat i bin kisim wok bilong Sir Michael olsem Praim Minista, i brukim loa na ol i oda long em i no tru tru praim minista.

Mista O'Neill i bin tok em i no luksave long dispela kot oda, bikos disisen bilong ol i wansait.

Long en, em i bin tok palamen i bin sindaun gen long Tunde long toktok long dispela hevi, tasol nau ol i pasim pastaim i kam inap long Trinde (Aste).

Dispela long wanem, liklik namba bilong ol MP tasol i bin kamap long haus palamen.

Long namel taim, Presiden bilong Otonomes Rijen bilong Bogenvil, John Momis, i tok em i kirap nogut long dispela tokaut bilong Suprim Kot bilong kantri.

Em i tokim Radio Australia, dispela disisen i kamap long taim we ol pipel i redi long nesenel ileksen bilong kantri.

Singaut i kamap long lukluk gen long eid polisi long Pasifik

WANPELA sinia 'savemeri' long wok developmen bilong Australia, i toke id progrem bilong Australia insait long Pasifik, i no wok, na ol i mas skelim gen.

Pasifik Koresponden, Campbell Cooney, i ripot ol pipel bilong Pasifik i nogat planti samting ol i stap turangu nau, moa long 30 yia i go pinis.

Dispela ol toktok i bin kam long Profesa Helen Hughes bilong Senta bilong Indipenden Stadis long Sidni.

Em i tok Gavman bilong Australia, i save pasim ai long ol gavman korapsen we i kamapim moa poveti o pasin turangu, insait long Pasifik.

"Ol i stilim wanem ol halivim, o turisim, o mineral we ol i developim bilong wanwan manmeri tasol, yupela i save olsem ol em ol wan-solwara bilong miopela, mipela i givim baksait long ol pinis," em i tok.

Tasol olupela bos bilong Hed ov Ekonomiks long USP, Yunivestiti bilong Saut Pasifik, Profesa Wadan Narsey, i no wanbel wantaim em.

Em i tok problem i stap long we ol i save yusim eid.

Australia na Nu Silan i save givim bikpela mani halivim long eid i go long ol kantri bilong Pasifik.

Vanuatu Paradais i bagarap long raskol pasin

OL MERI bilong Vanuatu i tok ol bikpela raskol pasin nau i wok long go antap, na dispela bai inap bagarapim gutpela nem bilong Vanuatu olsem wanpela Paradais bilong ol turis.

Lain bilong Wimen Agens Kraim, i bin mekim dispela toktok bihain long sampela ol raskol i bin kilim wanpela lapun meri na man bilong em long Pot Vila las wik.

Polis i tok dispela tupela lapun i bin kam long Holland long Yurop, na tupela i bin go long Vanuatu long malolo o ritaia long hap.

Pastaim long dai bilong tupela, sampela lain i bin paitim narapela waitman, husat i wanpela sitisen bilong Vanuatu, na em i bin stap long haus sik.

Na meri husat i go pas long Wimen Agens Kraim, Jenny Ligo, i tok ol dispela bikpela raskol pasin bai stopim tu ol foren investa i go long Vanuatu.

PNG PM, Peter O'Neill i makim nem long resis long ileksen

PAPUA Niugini Praim Minista, Peter O'Neill i putim nem bilong sanap resis long lalibu Pangia sia insait long Sauten Hailans Provins.

Kempen bilong 2012 nesenel ileksen i stat nau bihain long Gavana Jeneral i givim tok orait oda bilong ileksen long Fraide las wik.

"Mipela bin gat sampela tausan ol asples manmeri i bung raunim lokol kaunsel opis hia long bungim Peter O'Neill," PNG Niusman Liam Fox i tokim Radio Australi Pasifik Beat.

Las wik, olupela praim minista, Sir Michael Somare, i tok em i wok long skelim tingting long pinis wok na ritaia long politiks, long sanap gen long ileksen.

Olgeta kendidet i mas putim nominesen bilong ol long bipo long pinis bilong Fraide dispela wik.

Dispela i min ol bai gat faivpela wik olgeta long kempen na vot bai stat long Jun 23.

Wes Papua lida i tok Indonesia i no sem?

LONG dispela wik, ol pipel bilong Is Timor i wok long selebretim tenpela yia bihain long ol i bin kisim independens long Indonesia, ol pipel bilong Wes Papua i stap aninit yet long ol wok lukaut bilong Indonesia.

Long stat bilong ol 1960s Indonesia i bin go na kisim nating Wes Papua Aninit long wanpela kain wok em ol i bin kolim long Ekt ov Fri Sois, tasol ol Wes Papua pipel na ol sapota bilong ol i tok, dispela Ekt Fri Sois, i no stret, long wanem, olgeta pipel bilong Wes Papua i no bin givim tok orait long sanap aninit long Indonesia.

Dispela stori bilong ol i wankain liklik olsem ol pipel bilong Is Timor husat i bin pait agensim Indonesia long moa long 20-pela yia inap ol i bin kisim independens tenpela yia i go pinis.

Long makim tenpela yia indipendens, Is Timor i bin askim Indonesia Presiden, Sisilo Bambang Yudhoyono, long stap tu long ol dispela selebresen.

Dokta John Ondowame, wanpela Wes Papua Lida long Vanuatu, i tok em i no ting emi stret long Presiden Yudhoyono i stap long Is Timor, long wanem, kantri bilong en i bin kilim planti tausen pipel bilong Is Timor, taim ol i bin lukautim dispela kantri.

Qantas bai rausim 500 pipel long wok long Australia

BALUS kampani bilong Australia, Qantas, i tok em bai rausim 500 wokmanmeri bilong en long wok.

Kampani i tok dispela long wanem bai ol i bungim ol 'bikpela mentenens wok' nau bai kamap insait long tupela beis.

Ol yunion i autim bel kaskas bilong ol i go long Qantas, bihain long tokaut bilong ol olsem planti handret ol enjinia bai pinis wok, olsem hap bilong ol bikpela senis long ristraksa bilong elain kampani.

Ol bikpela mentenens opersen wok long Tullamarine beis long Melbon bai pinis long mun Ogas, we samting olsem 422 wokmanmeri bai lusim wok bilong ol.

Dispela, elain i tok, bai ol i ofa long ol woka long muv i go long Brisben na bai mekim olgeta samting long olgeta aprentisip wok bai go het yet.

Qantas enjinia yunion i singaut ol memba bilong en long holim ol miting raun long kantri, na Australia Laisens Ekraf Enjinias Asosiesen i tok ol woka bilong en i no save gut long dispela plen.

Wok bilong ol 737 long Tullamarine, nau bai go long Brisben, taim wok long ol 747 bai stap yet long Avalon, ausait long Melbon.

Strongpela ting- ting long banisim gut Koral Si

MOA long 400,000 pipel i givim toktok long wanpela inkwairi bilong Australia palamen i go long Koral Si (Coral Sea).

Koral Si i stat long isten eria bilong Gret Beria Rip Marin Pak, na em i kamap long boda bilong Papua Niugini, Solomon Ailans na Nu Kaledonia.

Dairekta bilong Protect Our Coral Sea Campaign, long Pew Envairomen Grup, Imogen Zethoven, i tok ol tingting i bin kam long olgeta hap long wol i go long inkwairi.

Australia gavman i laik developim wanpela marin risev long dispela eria bilong banisim tupela long twent-faiv koral rip i stap long dispela hap.

Mis Zethoven i tok bikpela bagarap em i ken kamap long rip bai i kam long komesal na rekriesen fising.

Em i laik bilip olsem nau ol Pasifik ailan kantri i laik banisim Koral Si, bai ol i ken developim wanpela bikpela marin pak.

Tasol Mis Zethoven i tok dispela bikpela samting bilong ol envairomen ektivis, em long banisim Koral Si rip insait long solwara bilong Australia.

Aipas Ektivis man bilong Saina i go long Manhattan

WANPELA ektivis man bilong Saina, Chen Guangcheng, i kamap pinis long Amerika wantaim famili bilong em.

Aipas ektivis em pipel i save long em bihain long em i bin tokaut long pasin i save kamap long Saina long rausim pikinini long bel bilong ol mama, long ol kantri o ples ausait long ol bikpela siti long Saina, i kamap pinis long Amerika.

Balus bilong em i bin kamap long Newark ples balus long Nu Jesi (New Jersey) long las wik Sarere nait.

Em i bin toktok long ol niusmanmeri ausait long Nu York Yunivesiti hausing na tok em i amamas long gavman bilong Saina long go isi long stretim rot bilong em na famili bilong em.

Mista chen i bin gat wanpela man long tanim toktok bilong em long Manhattan.

Em bai stap skul long loa skul long Nu York Yunivesiti olsem wanpela felo.

Mista chen i bin stap insait long wanpela hevi namel long ol gavman bilong Saina na Amerika bihain long em i bin ronawe lusim haus bilong em we em i stap kalabus, na go insait long embasi bilong Amerika long kapitel siti bilong Saina, em Beijing.

Bihain long sikspela de long stap aninit long lukaut bilong Amerika, em i lusim kantri bihainim agrimen we em i tok em i pret yet long laip bilong em long Saina.

Em i bin wok long kisim marasin samting long haus sik taim namba tu agrimen namel long Amerika na Saina i kamapim na larim em i go long Nu York wantaim famili bilong em long skul long loa.

Long Sarere, Mista Chen i bin tokim ABC olsem em i no bin gat paspot taim em i bin go kamap long ples balus long Beijing. Em i bin tok ol i bin tokim em long redim ol bek samting bilong em long go long Yunaitet Stets na em i kisim ol travel pepa bilong em pastaim long em bai lusim kantri.

Tupela gavman wantaim bilong Saina na Amerika bai bilip olgeta samting i pinis nau olsem em i lusim pinis Saina na stap long Amerika.

Tasol tru, em i lusim pinis Saina, ol lain bilong humen raits i toklukaut olsem ating bai ol narapela kandere bilong famili na fren bilong Mista Chen long Sandong provins bai bungim ol kain mekimsave yet.

Humen raits ektivis em i save stap long Amerika, Bob Fu, i tok Mista Chen i wari long ol kandere bilong ol i stap yet long Saina.



Jada 012

Resis bilong kamap Praim Minista i op

RESIS bilong kamap Praim Minista bilong Papua Niugini i sanap ples klia pinis bihain long nesenel ileksen long mun Julai.

Long kamap Praim Minista em yumi save olsem politikel pati husat i winim moa sia long nesenel ileksen tasol bai go pas long kamapim Gavman na lida bilong dispela pati bai kamap Praim Minista. Dispela em lo bilong yumi aninit long Integriti ov Politikel Pati na Kendidet Lo.

Bikos nesenel ileksen i kamap nau, yumi bin lukim pinis olsem ol pati lida i putim han go antap long resis long dispela sit bilong Praim Minista. Tasol ol i no inap kisim dispela sia nating inap pati bilong ol i winim moa sia long ol arapela.

Ol pati lida husat laik winim moa sia na kamap Praim Minista em Belden Namah husat em Deputi Praim Minista nau na lida bilong PNG Pati, Sir Michael Somare olpela Praim Minista na lida bilong Nesenel



Alaiens pati, Peter O'Niell nau Praim Minista na lida bilong Pipels Nesenel Kongres pati, Don Polye husat em minista bilong Treseri na lida bilong THE or Traiam Herites Pati, Gavana bilong Enga Provins Peter Ipatas na sampela nupela pati nau i kamap. Ol lida bilong ol nupela pati olsem Garry Juffa husat em biknem Kas-toms Ofisa, Gren Sief Ila Geno husat em olpela Sief Ombudsmen Komisina na olpela Deputi Polis Komisina bilong Papua Niugini.

Sapos yumi skelim gut, ol pati husat i gat pawa na strong nau long pait strong insait long dispela nesenel ileksen long winim ol sia em PNG Pati, Nesenel Alaiens (NA), THE pati na PNC pati. Ol dispela pati em yumi

ken lukim olsem ol geta strong long sait bilong risos, ol gat moa gutpela kendidet na ol lida i stap pinis na ol bai kam wantaim pawa na nois bikos ol gat mani na bisnis long sapotim ol.

Narapela tu em ol gat pawa long winim ileksen bikos ol lida bilong ol i gat nem na bikipela rekot long kantri we ol pipel i save long en. Na dispela em wanpela bikipela eria ol pipel i gat rispek long sapotim ol long winim ileksen tu.

Yumi save pinis olsem ileksen long Papua Niugini i no save liklik samting. Olgeta pipel i save mekim nois long en bikos ol bai sapotim tru ol lain o kendidet bilong ol long win.

Tru tumas ol lida o kendidet husat i gat pawa na mani bai mekim bikipela eksen tumas winim ol arapela kendidet na dispela ken pulim tin gting na sapot bilong ol pipel.

Tasol bikipela toktok i stap pinis olsem yumi ol pipel mas vot long laik na tingting

bilong yumi yet na nogat man bai pusim yumi long votim husat. Em laik bilong yumi stret long makim lida.

Oraityumi lukluk long husat bai kamap Praim Minista bikos klostu 5-pela biknem lidaman i putim han go antap pinis long holim dispela sia. Nau em yumi ol pipel yet mas skelim husat tru inap kamap gutpela Praim Minista bilong ranim kantri bilong yumi.

Sapos nogut Praim Minista, sore bai yumi bungim planti hevi long kantri bilong yumi long bihain taim bikos planti wok na ron bilong kantri bai go krangi na yumi ol pipel bai bungim pen stret long sindaun bilong yumi.

Amamas bilong kisim dispela bikipela sia bilong kantri em wanpela samting. Tasol long lukautim pipel na kantri em narapela samting. Na dispela i no liklik wok o isi samting. Em sia bilong pipel na pipel mas stap pas long olgeta tingting na disisen bilong Praim Minista na gavman bilong em.

WANTOK KOMENTRI

Mipela les pinis long krosipait bilong yupela

SAPOS ol manmeri bilong yumi long kantri inap long autim tingting bilong ol dispela krosipait long husat i praim minista, na husat i bosim gavman aninit long loa stret, bai olgeta i tok wankain.

Ol i les pinis.

Long kirap bilong wik i go pinis. Olgeta tingting bilong ol manmeri long kantri, em long ileksen i op.

I tru, sampela bel i bin sut las wik taim Palamen i mekim las sindaun bilong en, tasol palamen i bin sindaun, na ol i bin kirap long lusim haus tambaran inap long bihain bilong ileksen.

Planti long ol lain memba husat i bin mekim tok las wik, i autim wankain luksave olsem planti long ol, bai no inap sindaun insait long semba bilong gutpela haus palaman bilong ol.

Taim palaman i kirap, ol manmeri i pulim win gen. Bel-sut tingting i go hait, na mipela olgeta i redi long harim kundu i pairap na pasin tumbuna i brukim banis long ol taun bilong yumi long ileksen nominesen taim.

Tru tumas, ileksen i kirap, Gavana Jeneral i strongim han bilong em long sainim ova 600 rit-pepa, na ol kopi bilong ol rit pepa, long Admin Koles Konfrens Hol long Fraide.

Long 2 i go inap 4 kilok apinun, Sir Michael Ogio i sindaun sainim olgeta rit-pepa bilong wanwan provins na distrik, na bihain long 4-kilok, taim GG i silipim pen bilong em, kundu pairap, na singsing tumbuna i lait.

Tasol taim yumi bungim Tunde long dispela wik, Suprim Kot i tok makim bilong O'Neill na gavman bilong em i no stret aninit long Mama Loa bilong yumi. Em nau, bel-sut i kam klostu gen.

Tupela sait wantaim i resis long strongim kona bilong ol, na ol kar i spid pulim lain i go daun long Gavman Haus.

Tasol dispela taim, Sir Michael Ogio i tokim narapela Sir Michael olsem i mobeta ol i go painim em bihain long ileksen.

Mipela olgeta i no kirap nogut taim olgeta samting i go bek long han bilong ol loya gen.

Ol manmeri long kantri i les pinis long dispela pulim-taitim i go kam.

Ileksen i ron pinis. Tumora (Fraide, Me 25) bai lukim nominesen taim i pinis. Em nau, bai yumi harim ol kendidet i pairap i go kam.

Hamas yia yumi no harim nek bilong ol, bai yumi kirap nogut olsem dispela dok, em i no dai. Em i stap yet, na nau em i wok singaut gen.

Pasim get, na lokim gut tingting bilong yu. Noken painim kaikai, bia o mani. Nogut yumi kaikai beltait long kaikai bilong gris toktok, na yumi bai belpas na hangere faipela yia gen.

Ating ol lida bilong yumi mas luksave long sia bilong praim minista olsem: "Dispela sia, em i no bilong yu. Em i no bilong Papa bilong yu; na em i no bilong Tumbuna bilong yu. Sapos yu kisim. Mekim gut wok bai yu ken kisim bek gen. Sapos yu no mekim gutpela wok wantaim dispela sia, lusim, na larim narapela i kisim."

WANTOK

Published Weekly, Thursday, for

Word Publishing Company, Ltd.

P.O. Box 1982, Boroko, NCD

Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Pe bilong wanpela yia
52 niuspepa

Ples:

PNG

AUSTRALIA

ASIA PACIFIC na JAPAN

AMERICA na EUROPE

Air:

K220.00

US\$110.00

US\$150.00

US\$210.00

General Manager
Elizabeth Konga

Editor
Neville Choi

Published at
Able Building Complex,
Sec 58 Lot 02,
Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Strongim wok konsevesen...

Nupela redio progreman na buk ol sumatin bilong Kikori i kam apim i kisim long ples klia ol samting i sut long envaironmen PNG i wok long bungim...

WANPELA konsevesen projek long Kikori eria bilong Galp provins i wok long pulim bikpela intres long ol sumatin na komyuniti long sevim envaironmen na ol samting i stap long en, na tu, helpim ol sumatin long autim tingting na toktok.

Projek ya em i wanpela wok patna namel long Yunivesiti bilong Kenbera, CDI-FM, Kopi Praimeri skul na Kikori Praimeri na Sekonderi skul.

Aninit long dispela projek, wanpela redio progreman i wok long pulim planti lain i harim CDI-FM, wanpela komyuniti redio progreman long Galp bilong Papua long putim yau long dispela progreman. Na i gat bilip olsem dispela progreman bai kamap tu long ol narapela redio stesen long Galp provins na tu, PNG.

Patnasip ya i wok long mekim pipel i luksave long ol birua na bagarap i kamap long envaironmen (bus, graun, wara na solwara na ol samting i stap aninit, insait na ausait long ol) long PNG.

Wanpela redio pilai i stap long wanpela buk na CD na we risetsa bilong Kenbera Yunivesiti, Dokta Carla Eisemberg na ol praimer na sekonderi skul sumatin i bin kamapim long yia 2008 i wok long kamap Inau tasol long ol skul na ol redio stesen long kantri.

Karakta o husat tru i stap long redio progreman na buk em Piggy, narapela kain trauzel i gat nus olsem pik we ol i painim long ol wara bilong Galp bilong Papua.

Esso Hailans kampani i fandim kos bilong prinin gen buk bilong Piggy trauzel na ol skrip bilong Piku long redio. Opereta bilong PNG LNG Projek i mekim bikpela wok long konsevesen o sevim envaironmen long Kikori na Omati Riva besin o eria. Dispela em i ples bilong trauzel i gat nus bilong pik, wanpela kain trauzel tasol ol i painim long dispela eria.

Dokta Eisemberg i tok ol i kamapim redio progreman, "Piku on Redio, olsem rot long kamapim awenes long ol hevi bilong envaironmen we ol komyuniti long Kikori i bungim long en.

Tasol em i tok taim progreman ron na ol i wokim ol rekoding wantaim ol sumatin, ol bin luksave olsem dispela em i gutpela rot i ken helpim ol sumatin long gat "self confidence" o sanap na toktok wantaim nogat

pret pasin.

Baioloji tisa Colin Sauka bilong Kikori Sekonderi Skul i tok projek ya i helpim ol sumatin long tokaut long ol samting i stap long tingting bilong ol long ol samting i stap klostu long ol.

Ila Aukamu bilong Kikori Sekonderi skul husat i stap insait long redio projek, i tok em i lainim planti samting long ol bikbus na ol animal olsem em ol bikpela samting.

Em i tok sapos yumi no lakautim ol gut nau, bai ol i dai olgeta na yumi bai nogat ol dispela samting long bihain taim.

Em i tok long gutpela bilong yumi olgeta, i moabeta yumi lukautim ol gut.

Ila i bin stap insait long redio pilai i tok em i amamas long Piku Projek i stap long Kikori bikos em bai skulim pipel long luksave long ol samting ol i gat, na lukautim gut envaironmen.

Long 2008, wanpela buk bilong ol pikinini i bin kamap long baioloji na konsevesen bilong trauzel i gat nus bilong pik, na tilim i go long ol skul long Kikori.

Wantaim taitel, "Adventures of Piggy on the Kikori River", em bin putim wantaim ol feks o toktok long konsevesen na laip histori bilong trauzel i gat nus bilong pik wantaim ol gem samting long en.

Bihainim dispela, ol sumatin i soim bikpela intres long ol ektiviti insait long buk. Buk i helpim gut ol tisa olsem risos buk long yusim long ol narapela sabjek olsem envaironmen stadi, komyuniti living, ats na matematis.

Namba tu hap bilong konsevesen awenes projek em redio projek. Ol bin kamapim 6-pela skrip ol i tanim i go long Tok Pisin na Hiri Motu. Wan wan skrip i gat ol wan wan animal we ol i inteviuwim na givim ol sans long toktok long ol samting i kamapim envaironmen.

Wanpela eksampel long skrip namba tu em, Baramandi nem bilong em Bart. Em i toktok long redio na toke m i sik bikos em i kaikaim plastic bek. Man i kari-maut inteviu long progreman na Bart i go het na toktok long ol bagarap we tromoim ol pipia long wara i ken kamapim.

Ol sumatin bilong Kikori Praimeri skul i bin kalaim ol skrip bilong Piku on Radio buk.

Plantu papamama i amamas na sapotim dispela.

Ol i tok dispela bai helpim ol lain i kam bihain long go insait long projek i lukautim envairon-

men na dispela i gutpela.

Ol tisa tu i tok Piku Projek i ken helpim ol sumatin na komyuniti long ol samting i kamapim ol komyuniti na pipel i ken lukautim envaironmen bilong ol na ol yet.

Dokta Eisemberg i bilip olsem envaironmen na edukesen i tupela samting we planti eria i ken yusim. Dispela i min olsem ol tisa i save skulim ol wan wan eria i ken yusim dispela metiriel long skulim ol sumatin long saiens, baioloji, ats na drama.

Sapos ol skul na redio stesen i laikim Piku on Radio buk na CD, ol i ken putim askim bilong ol tai mol i salim email i go long pikuonradio@iae.conberra.edu.au



Katun bilong Piku, pik nus trauzel...



Tupela buk ol i bin kamapim, Adventure of Piggy na Piku on Radio long CD tu...



Buk bilong "Adventure of Piggy on Kikori River" ol bin lonsim long Kikori Primary Skul...

RADIO AUSTRALIA TOK PISIN PROGRAM
HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Spots
7.30PM Nius na Karen Afecas
8PM Helt
8.15PM Musik
8.30PM NIUS
8.40PM Spots Riplei
8.53PM Musik
9PM Stesen Pas

TUNDE - *Morning - Nait*
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afecas
8PM Mama Graun
8.15PM Musik/Spots
8.30PM NIUS
8.40PM Helt Riplei
8.55PM Musik
9PM Stesen Pas

TRINDE - *Morning - Nait*
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afecas
8PM Focus
8.15PM Musik/Spots
8.30PM NIUS
8.40PM Mama Graun Riplei
8.55PM Musik
9PM Stesen Pas

FONDE - *Morning - Nait*
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afecas
8PM Youth
8.15PM Musik/Spots
8.30PM NIUS
8.40PM Focus Riplei
8.55PM Musik
9PM Stesen Pas

FRAIDE - *Morning - Nait*
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afecas
8PM Wantok
8.15PM Musik
8.30PM NIUS
8.40PM Youth Riplei
8.55PM Musik
9PM Stesen Pas

SARERE - *Nait*
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius
7.40PM Wantok
8PM Lokal Ben
8.30PM Nius
8.40PM Musik/Chit Chat
9PM Stesen Pas

SANDE - *Nait*
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius
7.40PM Femili Blong Serah (Radio Plei)
8PM Lukluk Bek Long Wik
8.30PM Nius
8.40PM Musik/Chit Chat
9PM Stesen Pas

Danis tumbuna na ol ben
bai hot long Ileksen

Ol tumbuna grup na
ben bai mekim gupela
mani liklik long ol dispela
taim bilong ileksen,
sapos yu gat ben grup
go painim ol nupela
kenidet na askim long
pilai ben.





National Weekly Hit Parade:

Produced & Host by: Kasty

Satellites: Talaiga Sophie & Poroman Crew

Week Ending: Saturday – 28th April 2012

Week Before	Last Week	This Week	Charting Song:	Artist:
3	3	1	Black Baby Lewa	Chris Sime ft Nathan Nakikau & Bready Bones
1	1(6)	2	Sarefaina	Garry Vailbua ft Juggly
2	2(6)	3	B.K	Unique ft Jay Ronson
4	4	4	Satisfy	Sibela Band ft Vanessa Fotul
5	5	5(4)	Old Muta Medley	Garry Vailbua
6	6	6	Why ya lusim mi go	B-Rad
7	7	7	Me found love	Jokema
13	10	8	Fallen Angel	Waleos of Pangia
8	8	9	My People	Jah'varnz ft P-Naka
18	17	10	Ene hog moraka	Batak
11	11	11(4)	Angie Girl	Logic Crew ft Isaac Yama
9	9	12	Femua Nakutua	Tevaea B Gravity / James Sime
15	14	13	Ni laikim ya stap	Iden-tical
17	15	14	Lewa	Iden-tical ft Webster & Mickey
10	12	15	Orchid V-Las	Leonard Kania
12	13	16	Lewa	Kimo Maie ft Channel X Crew
6	18	17	Waiga Beat	Hayson Agema
0	19	18	Dizz	Rodney Pokagino ft Delma Misor
0	0	19	Sentex Mori	Strive
16	20	20	Hidden Valley	Batak
	Song	In:	Sentex Mori	Strive
		Out:	Kiri	Reggie ft Twin Tribe

5:00 AM G JOYCE MEYER.
5:30 AM G TODAY
9:00 AM G CLASSROOM BROADCAST
9:00 – 9:40 GRADE 7 MATHEMATICS
9:50 – 10:30 GRADE 7 SCIENCE
10:40 – 11:15 GRADE 8 MATHS
11:20 – 12:00 GRADE 8 SCIENCE
12:00 AM G MIDDAY NEWS UPDATE

TORO



BIABIA



KANAGE



TOKWIN

Blek aut paulim planti lain

BLEK aut long sampela hap long Mosbi long Tunde nait i go inap moning, sampela manmeri long siti gat wok long bikipela moning long Trinde na taim ol kirap long bet, ol ting olsem lait kam bek pinis.

Planti nogat was na go wok long wanem ples bilong waswas i tudak, sampela ol painim hat long anim klos na putim wanem klos i gut-pela long ai bilong ol. Wanpela papa tu i paul long soks bilong em na kisim wait skul soks bilong pikinini bilong em, na karim

wantaim su bilong em go long kar, taim em laik putim em painim aut olsem soks bilong pikinini bilong skul. Em putim su nating inap long avinun, em tu i no ring long haus long toksave, em poret long meri bai paia long em.

Tai map bilong ol Memba

DISPELA Fraide, em bai ol-geta memba bilong yumi bai kamap wankain manmeri olsem yumi. Dispela pawa ol gat long en bai pinis long 4-kilok long avinun. Planti bai go bek long ples bilong ol na grisim ol pipel long ples long makim ol gen long kisim dispela pawa gen. Bipo ol manmeri long ples

save paul long giaman gris toktok bilong ol manmeri husat laik resis long ileksen, tasol nau planti save pinis long giaman toktok bilong ol manmeri husat laik resis. Dispela ileksen bilong dispela yia, planti bilong ol yangpela manmeri bai resis long en, long wanem dispela bai lukim save bilong ol olpela lain na ol yangpela lain. Planti bilong yumi nau bai was gut tru long ol mani na ol samting bilong ron long dispela 3-pela wik bilong kepen. Tok nau ol manmeri long rot mekim em, yumi kaikai tasol wanem tingting na wanem manmeriyumi lai makim em rait bilong yumi, em trupela tok. TOKWIN TASOL

T	A	R	A	G	A	U	B	I	L	O	N	G	N	A	I	T
A	E	J	M	S	I	L	P	E	D	R	C	B	N	A	Y	L
J	K	P	O	I	E	S	E	J	K	U	M	U	L	R	I	P
N	A	U	R	K	A	L	A	N	G	A	R	N	I	O	I	D
F	K	E	S	D	E	P	A	T	M	I	L	E	R	S	O	S
R	A	R	U	K	O	K	O	M	O	R	U	S	I	O	P	K
V	R	I	N	L	T	P	P	I	O	E	A	N	X	K	N	O
G	U	R	I	A	I	A	H	I	E	R	T	S	W	A	L	K
E	K	S	I	U	U	H	R	E	G	I	A	M	N	V	S	I
W	I	W	B	C	J	I	L	A	R	T	P	I	P	I	V	D
S	J	G	P	A	T	O	L	A	G	Z	C	B	T	V	I	P
I	H	J	D	O	N	E	S	F	E	A	U	A	O	I	V	B
A	B	M	K	E	P	R	S	F	R	Y	U	L	I	O	P	U
N	V	T	L	T	R	D	K	A	K	A	T	U	B	N	I	K
A	O	S	I	W	T	F	C	N	L	U	P	S	E	S	O	A
K	F	A	U	A	S	I	A	D	G	J	K	L	P	I	T	O
A	W	E	B	S	U	B	G	N	O	L	I	B	L	U	A	P

Painim ol dispela nem bilong ol pisin:

PISIN	KUMUL	PAUL BILONG BUS	KAKARUK	KAKATU
KOKI	BUKA	KOTKOT	GURIA	SELA
BALUS	PATO	WAITPELA GRAS	TARAGAU	KAVIVI
KOKOMO	KALANGAR	TARAGAU BILONG NAIT KANAI	PIPI	

		3	8			5	7	
5		6						8
4		7	9	2				
	3	9		8	6	2	5	
			2		1			
	6	1	3	5		8	4	
				4	8	1		2
3						6		5
	1	2			3	7		

7	2	8	1	4	3	5	9	6
1	5	9	7	6	8	2	4	3
4	3	6	2	9	5	8	7	1
9	8	4	3	5	7	6	1	2
2	6	5	8	1	9	4	3	7
3	1	7	6	2	4	9	5	8
8	9	2	4	3	1	7	6	5
6	4	3	5	7	2	1	8	9
5	7	1	9	8	6	3	2	4

Ansa bilong las wik Sudoku

Ansa bilong las wik Pasol

K	U	N	A	I	K	A	B	I	S	K	I	A	U	B
T	R	A	I	S	A					O	U			R
S		A		P			K			K	O	R	K	A
A	D		P		O	A		A		K	O	I	L	U
N		R		I	P		I			O	N		K	I
A		A		O			N			A		A	N	T
N		I	I		K	U	L	A	U	S		R	E	A
A		S						P				B	K	
K	O	N	I	P	I	T	P	I	T					
S			K							N		A		A
I			A	N	I	E	N			E		L	P	K
N										L		I		A
			Y	A	R	B	O			E	K	A	I	P
B	I										O	T	E	T
R	P	L	A	U	L	A	U							
I	O													
P	K	O	P	R	A					K	A	W	A	W

EMTV Television Guide

12:05 PM AUSTRALIAN NETWORK
1PM - 3PM G CLASSROOM BROADCASTS continues.....
1:00 - 1:40 GRADE 6 MATHEMATICS
1:50 - 2:30 GRADE 6 SCIENCE
2:30 - 3:00 DEPI
3:00 PM G KIDS KONA
3:00PM - DORA THE EXPLORER
3:30PM - NEW MACDONALD'S FARM
4:00PM - THE SHAK
4:30PM - KITCHEN WHIZ
4:57 PM EMTV TOKSAVE
5:00 PM G HOT SOURCE
5:30 PM G MILLIONAIRE HOT SEAT
5:55 PM CRIME STOPPERS
6:00 PM G NATIONAL EMTV NEWS
7:00 PM G NRL ROUND# 10
Panthers vs. Dragons - Live/CH.9
8:57 PM G EMTV TOKSAVE
9:00 PM G TOK PIKSA
9:30 PM G SPORTS SCENE
10:00 PM G SUPER 15 RUGBY

Reds vs. Chiefs "Replay"
12:00 AM G EMTV NEWS REPLAY
1:00 AM AUSTRALIAN NETWORK

TUNDE 29 Me, 2012

5:00 AM G JOYCE MEYER.
5:30 AM G TODAY
9:00 AM G CLASSROOM BROADCAST
9:00 - 9:40 GRADE 7 MATHEMATICS
9:50 - 10:30 GRADE 7 SCIENCE
10:40 - 11:15 GRADE 8 MATHS
11:20 - 12:00 GRADE 8 SCIENCE
12:00 AM G MIDDAY NEWS UPDATE
12:30 PM G AUSTRALIAN NETWORK
1PM - 3PM CLASSROOM BROADCASTS continues.....
1:00 - 1:40 GRADE 6 MATHEMATICS
1:50 - 2:30 GRADE 6 SCIENCE
2:30 - 3:00 DEPI
3:00 PM G KIDS KONA
3:00PM - DORA THE EXPLORER

3:30PM - NEW MACDONALD'S FARM
4:00PM - THE SHAK
4:30PM - KITCHEN WHIZ
4:57 PM G EMTV TOKSAVE
5:00 PM G HOT SOURCE
5:30 PM G MILLIONAIRE HOT SEAT
6:00 PM G NATIONAL EMTV NEWS
7:00 PM G HAUS & HOME
7:27 PM G EMTV TOKSAVE
7:30 PM THE VOICE S1
Performances Part 1
9:30 PM G FUNNIEST HOME VIDEO SHOW
10:30 PM EMTV NEWS REPLAY
12:00 PM Australia Network

TRINDE 30 Me, 2012

5:00 AM G JOYCE MEYER.
5:30 AM G TODAY
9:00 AM G CLASSROOM BROADCAST
9:00 - 9:40 GRADE 7 MATHEMATICS

9:50 - 10:30 GRADE 7 SCIENCE
10:40 - 11:15 GRADE 8 MATHS
11:20 - 12:00 GRADE 8 SCIENCE
12:00 AM G MIDDAY NEWS UPDATE
12:30 PM G AUSTRALIAN NETWORK
1PM - 3PM CLASSROOM BROADCASTS continues.....
1:00 - 1:40 GRADE 6 MATHEMATICS
1:50 - 2:30 GRADE 6 SCIENCE
2:30 - 3:00 DEPI
3:00 PM G KIDS KONA
3:00PM - DORA THE EXPLORER
3:30PM - NEW MACDONALD'S FARM
4:00PM - THE SHAK
4:30PM - MR. MAKER
4:57 PM G EMTV TOKSAVE
5:00 PM G HOT SOURCE
5:30 PM G MILLIONAIRE HOT SEAT
5:57 PM G CRIME STOPPER
6:00 PM G NATIONAL EMTV NEWS
7:00 PM G THE WORLD AROUND US
- The War Reporter
8:00 PM G ULTIMATE GUINEAS
WORLD RECORD

8:30 PM G THE SECRET MILLIONAIRE S1 - EP#6/6
9:30 PM SURVIVOR Returns.....One World
The 24th Edition of the reality series strands 18 castaways on a single Samoan beach, where they are divided into all-male and all-female tribes to vie for the \$1 million top prize.
10:27 PM G EMTV TOKSAVE
10:00 PM G NRL ROUND 10 HIGHLIGHTS
10:30 PM G EMTV NEWS REPLAY
11:30 PM - Australia Network - NEWS REPLAY

Program bai senis long taim bilong en..



NEM: Ludwick Monduk
KRISMAS: 25 (man)
ADRES: C/- Clerance Kombukun, PO Box 302, Kimbe, West New Britain Provins
SAVE LAIKIM: Rit, mekim pani, wok, pilai, harim musik, lukim TV na mekim poroman.

NEM: Monita Raio
KRISMAS: 22 (meri)
ADRES: Lae Ever Green, PO Box 167, Lae Morobe Provins
SAVE LAIKIM: Go Lotu, RitimBaibel, pilai gita, singsing, mekim poroman, pilai ol bol gem, wok long gaden, ,wasim ol klos na raitim pas.

NEM: Womie Ben- Efore
KRISMAS: 26 (man)
ADRES: C/- Christ For The Nations, PO Box 1332, Lae, Morobe Provins PNG
SAVE LAIKIM: Lainim tok ples, senisim pre-sen, harim musik, gaden na painim wanpela poromeri long stap wantaim oltaim.

NEM: Aweqwii de Paps
KRISMAS: 24
ADRES: K- Toro Hire Cars, PO Box 111, Vanimo, Sandaun Provins
SAVE LAIKIM: Go Lotu, ritim ol buk o niuspepa na mekim pren.

NEM: Gitfty Ocloo
KRISMAS: 34 (meri)
ADRES: PO Box 35, Agona Nyakrom, Ghana - Phn: 0023354787139
SAVE LAIKIM: Raitim pas, painim wanpela man long maritim na stap wantaim oltaim.

NEM: Shirley Hori
KRISMAS: 18 (meri)
ADRES: Marinumbo Primary School, PO Box 352, Wewak, East Sepik Provins
SAVE LAIKIM: Harimm, danis, kuk, wasim klos, pilai spots, Go Lotu, mekim pani na go swimming

NEM: Sharon Tatapai
KRISMAS: 15 (meri)
ADRES: Yaraka Memorial School, PO Box 532, Kavieng, New Ireland Provins
SAVE LAIKIM: Go Lotu, lukluk CD na pilai spots.

NEM: Nasain Calvin
KRISMAS: 14 (meri)
ADRES: Yaraka Memorial School, PO Box 532, Kavieng, New Ireland Provins
SAVE LAIKIM: Pilai Spots, Go Lotu, Lukim CD na rit planti

NEM: Karl Pewa
KRISMAS: 30 (man)
ADRES: Semoroks Gospel Club, PO Box 3368, Lae, Morobe Provins.
SAVE LAIKIM: Stap wantaim Jisas, Pilaim gospel musik na laikim kristen Lutheran meri o arapela sios meri husat igat strongpela tingting long pilaim musik bilong God.

NEM: Darren Calvin
KRISMAS: 15 (man)
ADRES: Yaraka Memorial School, PO Box 532, Kavieng, New Ireland Provins
SAVE LAIKIM: Lukim CD/Pilai Spots na Ridim buk

Kanage selebretim midia fridom de long las wik Me 5..Em de ol-geta midim indastri toktok strong long fridom bilong midia.. Kanage em sanap strong na protes...



Em tru tru kisim sevis i go long pipel o?

Dia Laipain,
MI BILONG narapela provins, tasol mi poromanim gut wanpela man bilong provins mi stap na wok long en moa long 30 krismas. Poroman ya i bin askim mi long go lukim ples bilong em. Long kamap long ples bilong em long balus, em i save kisim 30 minit. Na mi go pinis tupela taim.

Wanpela krismas, em bin stap long ples wantaim famili bilong em na em i askim mi long go stap wantaim ol long krismas malolo bilong mi. Tasol long dispela taim, ol i stopim ron bilong balus i go long eria bikos ol i tok em i no gut-pela long sait bilong mani.

Maski mi bilong narapela provins, mi no bin laik tok nogat long askim bilong poroman ya, na mi bin wok hat long painim rot long go.

Bihain mi painim aut long ol lain bi-long dispela ples we poroman bilong mi i kam long en. Na ol i tok sapos olsem wanem, mi ken bihainim ol long wok-about long wanpela bus rot bai kisim 4-pela de n a n ait long go kamap long ples.

Mi bin laik lukim stret long ai bilong mi na eksperiensim mi yet na mi bi-hainim ol na wokabaut.

Long dispela bus rot we mipela i bi-hainim, mipela i klaimin 7-pela maunten n a kalapim 7-pela bikipela wara. Klostu sampela long mipela i bin bungim bikipela birua na dai.

Mi sori long ol asples manmeri husat i kisim taim tru long karim ol samting ol i baim long siti long kaikaim na yusim long ples. Sampela i tokim mi olsem ol i bungim hevi long dispela eria long sampela yia taim nau.

Tasol bihain long longpela rot mipela i wokabaut long en, mipela i go kamap long ples bilong poroman bilong mi. Ol-geta famili memba na ol hauslain i amamas tru long lukim mi na ol i kam long bungim mipela na kisim mi i go long haus. Mi bin amamas stret long malolo long ples bilong poroman na famili bi-long em. Malolo i pinis mi bin go bek. Tasol mi sori stret olsem poroman bi-long mi na pipel bilong em i painim hat yet bikos i nogat rot na balus long go long ples bilong ol.

Mi harim nau tasol long sampela savelain olsem Palamen memba bilong eria i go na opim ples balus na tu, baim



sabsidi fi long wanpela balus kampani long mekim ron i go long dispela eria.

Laipain, inap yu tokim watpo na bi-hain long planti krismas em i no tingim pipel em i wokim dispela? Em i wokim dispela bikos em i taim bilong ileksen? Dispela em i trupela rot long kisim sevis i go long pipel o, narapela rot long baim ol vot?

Struggling Soul Dia Pren,

Mipela i kisim na ritim pas bilong yu wantaim bikipela intres long ol samting i wok long kamap long kantri. Mipela i bilip olsem samting yu lukim long wan-pela hap i wok long kamap tu long ol narapela hap bilong kantri i stap long longwe ples bilong dispela naispela kantri bilong yumi.

Yu mekim gutpela samting long tok yesa long askim bilong poroman bilong yu na go lukim yu yet ol hevi we pipel i wok long bungim. Mipela i askim olsem husat tru bai harim krai bilong ol, tasol nogat narapela man moa. Em ol Pala-men mem ba tasol husat i gat wok long lukautim welfe bilong pipel bilong ol.

Mipela i strongim poroman bilong yu na pipel bilong em long save olsem ol memba i stap long sevim pipel long bildim ol rot, bris, ol skul na etpos na dispela i mas kamap long ol longwe ples tru tu.

Olsem na em i wok bilong ol Pala-men memba long stiaim, lukautim na gavanim pipel bilong ol. Na lukim olsem ol i kisim sevis i go long olgeta hap bilong kantri.

Pren, yu tokim mipela long palamen memba bilong eria i opim bek ples balus we i bin pas long longpela taim pinis. Samtin g i stap long han bilong em bikos em yet i save long samting em i wokim. Na long dispela taim, em i mas pilaim gut gem.

Mipela i bilip olsem long sampela we, long opim ples balus, tasol ol pipel bai inap long yusim sevis long wanem, em

i bikipela mani tumas long kalap long balus.

Yu tok tu olsme mem ba i baim sab-sidi fi long balus kampani na pipel i ken peim hap mani tasol na dispela i gut-pela. Askim we pipel i mas askim em, bai dispela i stap long ol yia i kam, na em bai helpim pipela?

I moabeta long gat rot sistem long wanem, planti pipel bai yusim rot na tu, kos bai liklik taim yumi glasim wantaim balus samting. Yumi kamap nau long taim bilong nesenel ileksen na i moa-beta long yu serim tingting wantaim poroman bilong yu na pipel bilong em na mekim kliia man husat bai yupela i votim long dispela ileksen. i moabeta yupela i votim man o meri husat bai tingim yupela long 5-pela krismas em i stap long Palamen. Na i no dispela bai kam tasol long namba 5 yia husat i pilai long winim gem na bihain, em bail us.

I moabeta long pipel i kam wantaim na noken tingting long kain samting i stopim yupela long bung wantaim na wokim ol plen long wanpela bai tingim pipel. Mipela i bilip olsem dispela man bai kam long ples long namba wan yia bilong em, na kisim ol ripot long ol samting yupela i laikim na kisim i go long Palamen long lukluk long en. Taim i gat gutpela dibeit na em i win, bai i gat sevis we bai ol pipel long ples i kisim gutpela samting long em.

Olsem na planti pipel bai kam long givim yu vot long nem bilong kisim sevis i go aut, tasol tingim, God i harim pinis ol samting yu toktok long em na em bai rausim ol aiwara yu krai na i kapsait. Em bai kisim gutpela sevis taim yu painim Kingdom na ol stretpela pasin bai stap oltaim olsem i stap long Matyu 6:33.

Pren bilong yu Laipain

Sapos yu gat wari, rait i kam long Lifeline, P O Box 6047, Boroko, NCD. Telipon: 3260011. Raitim tru-pela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.

Laipain

LNG onso paiplain pinis hapwe

PNG LNG Projek i pinisim hapwe bilong onso paiplain bi-hain long ol wok man i weldim pinis 50 pesen bilong olgeta LNG ges paiplain.

Ol wokman i stat weldim ol onso paiplain long mun Epril las yia yet, maski weta kondisen na ples i no luk gut tumas.

Paipplain i ol paip bilong karim ges i kam long Hides, Juha, Angore, Kutubu, Moran, na Gobe i go long LNG Plent long Lealea.

Ofso paiplain em ol dispela paip ol bai planim long wara. Onso em ol paiplain ron antap long graun.

"Taim mipela i luksave gut long ol bus, wara na graun we paiplain bai ron long en, mipela i wok gut tru na hariapim ol wok," Suresh Batra, Onso Paiplain Projek Menesa, i tok.

"Bai mipela bihainim dispela kain pasin long pinisim ol laspela wok long planim ol dispela paiplain, na luksave long sefti bi-

long envaironmen na wok manmeri.

"Wok manmeri em ol namba wan samting bikos dispela wok i kamap gut bikos long kain kain save ol manmeri i yusim long mekim wok," Batra i tok.

Dispela onso paiplain em bai karamapim 292-kilomita, na bai karim ges i kam long Hides Ges Kondisening Plent, we nau yet ol i mekim wok i stap long pinisi, na karim ges i kam daun long Omati, we em bai joinim ofso (insait long wara) paiplain i go long LNG refaineri long Portion 152, Sentral Provins.

Olgeta hap insait long projek eria tu i wok long mekim hariap ol kain kain wok long larim namba wan PNG i salim namba wan LNG i go aut long kantri long yia 2014.

LNG PAIPLAIN...LNG onso paiplain em i klostu long pinis, na ol wok manmeri i amamas long gutpela wok bilong ol. *Poto: Esso Highlands Ltd.*



MUJV groa long liklik mani

Aja Alex Potabe i raitim

OL PAPAGRAUN bilong maining nan petroleum projek insait long kantri i save kisim gut bikipela mani i kam long ol royalti tasol ol i no save yusim dispela mani gut long mekim bisnis, wanpela papagraun long Hela i tok.

Ipape Hulijseli, wanpela papagraun bilong Saut Is (South East) Malanda wel na ges projek insait long laisens eria bilong multi-bilian-kina PNG LNG Projek i tokim bung bilong ol nius manmeri na maining na petroleum kampani las wik Fraide long Gateway Hotel, Mosbi, olsem ol papagraun i save long pilai pokis, dring bia na maritim planti

meri wantaim mani ol i save kisim long royalti, ekwiti, sid kapitel, developmen levi, na infrastraksa developmen gren (IDG).

Hulijeli, husat i menesing dairekta bilong wanpela papagraun kampani, Malanda Unincorporated Joint Venture (MUJV), i tok kampani i no bin luksave long en na ol papagraun bilong Malanda, tasol hatwok na stretpela pasin bilong lukautim mani tasol i bin mekim na, nau MUJV em kamap wanpela biknem kampani tu.

"Oil Search (OSL) em i save luksave gut long ol papagraun bipo long bikipela PNG LNG Projek i kamap. Ol papagraun bilong Gobe, Kutubu, na

Hides i save kisim gutpela ekwiti na royalty mani.

"Tasol mi bin statim MUJV wantaim K200, 000 dinau mani mi bin kisim long OSL. Taim ol arapela papagraun i bin kisim milian kina, mi bin statim long dispela liklik mani," Hulijeli i tok.

Nau dispela kampani i groa bikos em i gat sea long Trans Wonderland Ltd, Welgris Fuel Distributors, na em i save mekim sampela liklik kontrak wok bilong OSL na PNG LNG Projek long Moro, Sauten Hailans.

"Sapos ol papagraun i lukautim mani gut, mekim bisnis gut, na soim stretpela pasin long bikipela kampani, orait nogat wanpela samting bai

stopim groa bilong dispela kampani.

"Wel, ges o gol na kopa bai pinis 1-pela taim tasol sapos ol papagraun i lukautim gut mani na mekim bisnis gut, ol i ken kamap gutpela bisnis manmeri. Dispela sans save kam 1-pela taim tasol," Hulijeli i tok.

MUJV i stat long K200, 000 tasol nau em i gat 95 wok manmeri na em i mekim K13 milian winmani. Em i no save skelim winmani long ol 4, 767 seahola manmeri i kam long Huli na Onabasulu ples insait long Suat Is Malanda projek eria, tasol ol i wok long yusim dispela winmani gen long mekim moa bisnis.

Vanimo gutpela ples bilong Turis

Nicky Bernard i raitim

PLANTI provins long Papua Niugini ken pulim Turis long raun na lukim, na tu kam lukim pasin kastam bilong yumi wanwan.

Vanimo taun long Sandaun Provins em wanpela ples we i ken pulim tru ai bilong ol turis. I gat ol gutpela nambis wesani wait, na planti ol liklik ailan bilong malolo na planti moa ol samting.

Bikipela samting em ol mas gat bikipela bris bilong ol turis sip long kam na pas long en. Dispela tasol Vanimo, i nogat. Ol nara-pela samting ol gat, ol gat ol hotel bilong slip, rot i orait long olgeta hap kona bilong liklik taun bilong ol, na ol pipel bilong Vanimo em ol lain bilong amamas taim ol lukim yu nupela pes.

Dispela liklik taun i

gat stail bilong em, yu ken wokabout tasol na raunim taun. Ol liklik ples bilong stap long we liklik long taun na bai hat long yu lukim olsem long bikipela siti Pot Mosbi.

Vanimo tu em olsem ovasis, taim yu go kamap long hap na painim ol 'PNG Made' samting, dispela bai bikipela mani liklik. Ol yet save kisim ol stoa samting bilong kam long Indonesia na ol save salim long liklik prais stret.

Sapos gavman gat tingting na mekim Vanimo olsem ples bilong turis olsem Alotau, planti tru bai go long hap na tu ol bikipela miting tu gen go long hap.

Tupela awa long balus long Mosbi go stret long Vanimo na dispela bai yu malolo gut long balus inap yu kamap long provins bilong San i go daun.

Gavman no save harim Ok Tedi maining miting

OK Tedi Maining em i 1-pela bikipela maining long PNG.

Em inap long pas long yia 2013, tasol ol papagraun, na gavman i ting ting long surukim laip bilong maining i go inap yia 2022.

Nau yet ol papagraun, kam-

pani na gavman i wok long holim ol miting long toktok gut long olsem wanem, dispela maining projek bai kamap.

Tasol ol wok man bilong gavman long Nesenel Plening, Jastis na Atoni Jeneral, Fainens na Tresari, na Envaironmen na

Konsevesen, i no save kamap long ol dispela miting.

Dokta Beno Boeha, husat i kam lukluk na skelim dispela miting, i tok gavman i bin kisim K10.7 bilian long yia 2000 i kam inap yia 2001.

Dokta Beno i tok em i moa

beta long nesenel gavman na provinsel gavman wantaim i harim dispela miting na wokbung wantaim papagraun na kampani long holim nupela agrimen na larim dispela maining i go het na groim ikonomi bilong kantri.

Daltron lonsim nupela kompyuta seva masin

Bustin Anzu i raitim

DALTRON kampani i lonsim wanpela nupela seva (server) bilong em long Lae aste.

Dispela seva, em HP Bladesystem Visualization ken helpim planti bisnis haus o komyuniti long mekim wok bilong ol long Infomesen Teknoloji.

Long lonsing bilong nupela seva,

nesinol presales Menesa Albert Kasokason i tok dispela nupela masin i ken mekim wok bilong ol isi olgeta, isi long wok, ino inap kaikai planti pawa na gutpela long karim raun.

"Mipela i mekim planti wok bilong ol kampani na ol i wok na i gutpela long ol tu i kisim dispela seva. Em ino inap westim taim na gutpela long wok long en. Dispela masin i ken mekim wok bilong planti lain in-

sait long sotpela taim," em i tok long breakfast lonsing aste long Lae Intanesinol Hotel long Lae.

Em i tok dispela ol sevis em wol klas (world class) tasol ol i ken yusim insait long kantri na em bai fitim ol stret. Em i gat siksipela rot o poin bilong hukim hap seva, em i min olsem, em i gat siksipela seva long wanpela seva masin tasol. Dispela masin em ol i salim long K180, 000.

Long wankain taim tu, ol i lonsim tu wanpela VSAT bilong ol. Dispela VSAT em isi long karim raun tu na ol i ken ring long olgeta hap insait long wol.

Mista Kasokason i tok planti bilong ol dispela bisnis nau ol i wokim, ol i wok long yusim Infomesen Teknoloji na nau ol i senisim dispela nem igo olsem Bisnis Teknoloji.

Em i tok tu olsem wok bilong ol

ino long Papua Niugini tasol, ol i muv igo pinis long ol narapela kantri insait long Pasifik olsem Solomon Ailan, Fiji na Vanuatu, we het opis i stap long Papua Niugini.

Kominekesen Systems Menesa Warwick Vele i tok planti bisnis haus insait long kantri i stap wantaim ol long sait bilong Infomesen Teknoloji (IT) na ol i laik traim long kamapim opis na sevis bilong ol insait long kantri.

Pasifik bosim wol tuna

Neville Choi i raitim

INSAIT long risos saplai long wol, bikipela hap bilong ples-daun, i stap long solwara.

Na insait long solwara, bikipela mak bilong tuna pis saplai long wol, i stap long Pasifik.

Na long rot bilong pulim, mak bilong pulim, na hamas de ol i ken pulim pis, ol Pasifik i bos.

Pinis bilong mun Epril, na kirap bilong Mun Me i lukim bikipela kibung tru i kamap long Alotau, Milen Be provins.

Etpela Pasifik kantri, i bin bung, long skelim tingting na makim kos bilong lukautim saplai bilong ol tuna pis i stap long solwara bilong ol. Na moa yet, long painim rot we olgeta 8-pela kantri, i ken kisim bikipela mani-mak long dispela bikipela solwara risos.

Dispela 8-pela kantri, em Federeted Stets ov Maikronesia, Kiribati, Masel Ailans, Nauru, Palau, Solomon Ailans, Tuvalu, na Papua Niugini.

Olgeta dispela kantri i bung aninit long wanpela Pasifik sab-ri-jenal grup ol i kolim Parties to the Nauru Agreement, o PNA.

Dispela ol kantri i bin kirapim dispela Pasifik grup long painim ol nupela rot bilong yusim gut ol tuna pis risos i stap long solwara bilong ol.

Papua Niugini i bin namba wan kantri bilong sainim dispela agri-men long Nauru long Mas 16,



MAN GO PAS: Menesing Dairekta bilong Nesenel Fiseris Atoriti, Sylvester Pokajam, i bin givim sia bilong siaman bilong PNA i go long kantri Palau. Planti bikipela wok bilong PNA i kamap aninit long stia na lukaut bilong Mista Pokajam.



NUPELA SIAMAN MINISTA: Palau Minista bilong Netseral Risoses, Harry Fritz i tok tuna em i bikipela samting long ol Pasifik kantri, na bihain taim bilong ol. Em i samting bilong lukautim gut.

1982. Kiribati i bin namba tu kantri long luksave long Nauru Agrimen long Epril 27. Bihain, Solomon Ailans i bihainim long Ogas 18, Masel Ailans long Oktoba 14, Palau long Novemba 4. Federetet Stets ov Maikronesia i sainim long Julai 14, 1983, na Nauru long Me 28, 1985. Tuvalu i joinim PNA long Tuvalu long Me 15, 1991.

Long Alotau, narapela kantri, Tokelau, bin givim luksave long Nauru Agrimen.

Papua Niugini mausman na Menesing Dairekta bilong Nesenel Fiseris Atoriti (NFA) Sylvester Pokajam, i bin go pas long kamap bilong dispela grup, we nau i lukim planti nupela rot bilong lukautim, na skelim tuna risos i kamap gut, na givim ol kantri moa winmani.

Long Alotau PNA bung, Mista Pokajam, i lusim wok olsem Siaman bilong PNA, na i givim long Palau.

Mista Pokajam i tok aninit long Siamansip na stia bilong Papua Niugini, PNA i kamapim planti gutpela wok long sotpela taim tasol.

Namba wan bikipela wok-kamap em long kisim bren nem bilong Pacifical bilong ol pis i kam long ol PNA kantri solwara.

Maski ol dispela Pasifik kantri, em ol liklik kantri, PNA grup bilong ol em i namba wan tuna pis pes sain fiseri long wol long kisim MSC setifikesen o luksave.

MSC em i Marin Stuwatsip Kaun-

sil. Dispela luksave bilong MSC em i bikipela samting, bikos em i namba wan strongpela rot bilong kisim setifikesen, na olsem, ol skipjek tuna aninit long ol PNA kantri, i gat dispela namba wan glasim long pis bilong ol. Nupela PNG treding kampani, PACIFICAL i lukautim tok bilong inapim dispela setifikesen na luksave.

Narapela bikipela luksave long PNA, em long taim ol i namba wan fiseris grup long wol long tambu long kilim ol wel sak, na sanapim banis bilong ol na ol arapela abus long solwara.

Long ol wok bilong em wantaim ol kantri na pising bot i kam long pulim pis long solwara bilong ol PNA kantri, ol memba kantri mausman i tok olgeta wok-bung wantaim ol piseris kampani, em i stap ples klia, bihainim ol indipenden obseva i save stap long ol pising bot.

Wanpela bikipela toksave i kamaut long namba 30 kibung na yia bilong PNA, em long ol sivil sosaiti na indastri long wokbung wantaim.

"Ol kalsa, laipstail na laip sindaun bilong yumi i save sindaun long ol tuna bilong yumi na ol arapela solwara pis na abus. Ol PNG Minista i tok-makim bikipela luksave long kamapim mobeta ekonomik na sosol benefit long wok mipela i holim olsem ol wol lida long gutpela tuna menesmen," ol PNA kantri i tok.



The Benefits of Tuna

1. Excellent source of high quality protein.
2. Rich in mineral nutrients such as selenium, magnesium, and potassium.
3. Contains B vitamins that help build and maintain red blood cells and increase energy. These water-soluble vitamins increase the rate of metabolism, strengthen the immune system and help keep the skin healthy.
4. It has omega-3 essential fatty acids that help improve cardiovascular health by increasing heart rate variability (HRV). Omega-3 Fatty acids also protect the heart from developing abnormal rhythms that can be fatal.
5. Contains vitamins E and K. Vitamin E plays a role in preventing heart disease and might decrease risk of some forms of cancer. Vitamin K plays role in blood coagulation; it helps to prevent excessive bleeding upon injury and protect against spontaneous internal bleeding.



Celebrating World Tuna Day



RD TUNA CANNERS LTD.



Namba wan grup long greduet long Fud sekyu- riti program

TENPELA meri fama nau i gat moa save long mekim wok bilong ol na tu, long skulim ol narapela meri ol samting ol i lainim long en.

Ol dispela meri fama i bin skul long 12-pela wik aninit long Fud Sekyuriti program long Tropikel Not Kwinslen TAFE long Kens.

AusAID i bin sponsaim ol dispela meri aninit long Australia Lidasip Awod Felosip program.

Dispela Felosip Program i sapotim ol planti sotpela kos long profesenel developmen, wok plesmen, lidasip, strongim ol wok patnasip na likejis namel long ol ogenaísesen long Australia na PNG.

Presiden bilong ol meri long agrikalsa ogenaísesen em, Wimen in Agrikalsa Developmen Faundesen (PNG-WADF) na wokmeri bilong Nesenel Agrikalsa na Risets In stitut (NARI), Maria Linibi, i bin makim ol dispela meri long stap insait long Fud Sekyuriti program long Tropikel Not Kwinslen TAFE (TNQT).

Misis Linibi i tok program i givim gutpela sans long ol meri fama long mekim prektikel wok trening na dispela em i gutpela rot long givim

trenin g i go long ol PNG pipel.

Ol lain i kisim dispela kos i bin lainim tu long wokim ol prisentesen long givim save ol i kisim i go long ol narapela pipel long ol provins. Na Maria i tok dispela bai helpim long daunim ol banis long sait bilong komyunikesen we ol meri long PNG i gat long em.

Patnasip i bin go gut stret na nau, ol i wok long redi long salim narapela 36 pipel long go daun long TNQT long kisim setifiket bilong ol long Fud Sekyuriti.

Ol Lidasip Awod bilong Australia felosip i givim sans long ol ogenaísesen bilong Australia long developim ol netwok wantaim ol ogenaísesen bilong PNG, na kontribuit long developmen bilong PNG.

I save gat bikipela resis long ol dispela felosip program na ol i save ron bihain long tupela yia.

Ol lain i aplai long dispela program i mas wok long ol ogenaísesen bilong Australia we i wok long edresim ol praioroti developmen eria bilong PNG.

Raun 12 sabmisen i bin op long Me 14, 2012 na bai pas long Jun 20, 5 kilok apinun.



FUD SEKYURITI KOS LAIN: Hia em ol meri fama i bin sindaun long 12-pela wik kos long TNQT, Australia. Poto: Skolasip PNG Pablik Rilesen opis

BOOK NOW!

2012 HOLY LAND tours

FROM K9725*

PER PERSON
TWIN SHARE
MINIMUM
GROUP
NUMBER-20

VISIT 2 UNFORGETTABLE DESTINATIONS ISRAEL & JORDAN

13 NIGHTS / 14 DAYS



***INCLUSIONS:**

Return airfares Port Moresby ~Jordan via Singapore & Colombo, 3 star hotel accommodation, return airport transfers, meals where specified, all tours, coach transportation & fees, English speaking guide, Visa fees & border taxes for Jordan & Israel, airline taxes & surcharges.

MORE NIGHTS, MORE ATTRACTIONS, GREAT VALUE!

> The Sea of Galilee > Nazareth > Garden of Gethsemane > Bethlehem > Jerusalem > Masada
 > Qumran > The Dead Sea > The Jordan River > The Wailing Wall > Garden Tomb > Jordan River

2012 Departure Dates: Ex-POM: 12 July / 9 August / 15 September / 18 October / 15 November

Call toll free on **180 3444** or contact your nearest
Air Niugini Travel Centre or Travel Agent to secure your 'Holy Land' package!

*NB: Price subject to change depending on group size and flight/tour availability. Terms and Conditions apply.





SMAIL TASOL: Moeli (lephan) na Ailini, em tupela sumatin meri bilong kantri Palau. Ol i bihainim opisal delegesen bilong Palau i kam long Alotau PNA kibung, na ol i wok amamas long lukim stori bilong Tuna pis long PNG, we ol sumatin bilong Alotau i mekim skulwok long en.



GLASIM RAMU NICO PROJEK



Wanpela Ramu NiCo, Wanpela Komuniti

Ramu NiCo save sekim paiplain oltaim long Madang-Ramu Haiwe

OL MANMERI husat i ron long kar namel long Usino mausrot na Madang taun bai lukim wanpela bikipela paip i silip klostu long haiwe. Long sampela hap, paip i silip antap long graun na long sampela hap paip i silip aninit long graun.

Displa paip i karim graun we i mix wantaim wara long Kurumkukari (KBK) Main insait long Usino-Bundi i go kamap long Basamuk Rifaineri long Rai Kos LLG insait long Madang provins.

Graun i miks wantaim wara nating i kamap malumalu na ron insait long displa paip. Displa malumalu graun i gat nikel na kobalt we Ramu NiCo bikipela maining kampani long Madang i digim i go inap long 20-pela krismas.

Dispela paip we i silip antap long graun arere long rot em Gavman bilong PNG i bin tok orait long en wantaim luksave bilong ol papagraun. Na taim Ramu NiCo i putim dispela paip, em i nau stat long lukautim wantaim wok patrol long sekim insait long olgeta wik.

I bin i gat sampela giaman toktok olsem paip we i silip antap long graun arere long rot na i kamapim sampela birua olsem graun i buruk. Wanpela bilong ol dispela graun bruk em klostu long Kawawar maket we planti lain i save laik long stop na baim gutpla gaden kaikai.

Tasol wanpela wok painim aut we i bin kamap long Ramu NiCo taim ol i glasim na skelim dispela hap graun bruk, ol save man ol i kolim seveia painim aut olsem graun i buruk bikos i gat planti wara taim bikipela rein i bin pundaun. Dispela wok painimaut i kamap insait long dispela wanwan wik raun bilong ol saveman long lukautim paip.

Insait long dispela wikly ripot bilong sekim dispela slari paiplain we Ramu NiCo i kamapim long mun April dei 22, 2012 i tok klia olsem wok bilong glasim na sekim gut dispela paip arere long haiwe i bin stat long mun Jun las yia 2011 na i wok long go het yet nau.

Dispela wok bilong sekim na glasim paip i bin stat bihain taim tasol long kampani i bin joinim na putim paip antap na ananit long graun long mun August 2009 long arere bilong Madang-Ramu aiwe. Dispela wok bilong monitoring nau i wok namel long Ramu NiCo wantaim ol lain bilong gavman ananit long wanpela tok luksave namel long gavman na Kampani we as tingting em long lukautim ol wara, bus na graun bilong wanem nogut bai birua i kamap.

Kampani painim aut long wok monitorim na glasim bilong em olsem dispela graun we i buruk long 38 kilomita long Madang na 41 kilomita long KBK long ples ol i kolim Kawawar maket i bin kamap taim dispela

bikipela rein i bin stat long mun Mas dispela yia.

Ramu NiCo wantaim dipatmen bilong woks insait long Madang i luksave olsem dispela birua em rein i bin kamapim na tupela i bin wanbel olsem bai ol i wok wantaim long stretim dispela hap ples na bai pablik na paip bilong Ramu NiCo i noken painim birua.

Ol i bin stat wok pinis long displa hap we ol i rausim ol graun i buruk i kam daun liklik tasol na bai pusim displa paip i go insait na longwe long rot bilong kar. Bihain taim bai ol i wokim simen na bai em i holim strong.

Ramu NiCo i tok tu olsem displa hap graun buruk em rein i bin kamapim na ol i rausim ol graun antap long bai i no gat planti hevi antap na bihain taim bai nogat graun i buruk o i kam klostu long rot. Ripot i tok tu olsem displa graun buruk o move i kam klostu long rot i no bin stopim ol kar or pablik long husim rot o paip i baragap. Nogat!

Ramu NiCo i wok klostu wantaim ol bikipela gavaman lain olsem Madang provinsel woks departmen, Mineral Risos Autoriti (MRA), departmen bilong Environment (DEC) na ol narapla save man long stat bilong mun Februari long dispela yia we ol i wok wantaim long glasim paiplain na paitim tok wantaim long kamapim wok i go het gut stret.

Ramu NiCo wantaim Madang Provinsel Woks departmen bihain i bin sainim wanpela memorandum ov Andastending (MoU) we tupela bai wok bung wantaim na Kampani bai i ripot olgeta taim long wanem ol samting i kamap long paip na rot.

Ramu NiCo kampani i tok stret na tru olsem em bai i lukautim ol dispela paip na glasim gut stret long abrusim ol hap we graun bai buruk na bagarapim rot we tu bai i kamapim birua long ol pipol husat i save husim Madang-Ramu.

Kampani i tok tu olsem displa paip em kain paip we i strong na maski graun i bruk or guria na movim liklik bai i no nap bruk na ol graun malumalu na wara bai i kam aut na bagarap ol diwai, graun na bus.

Ramu NiCo insait long wok aweanes bilong em i save tok klia stret long ol pipel olsem sapos i gat wanpla buruk na ol graun malumalu i kam aut, displa em i no gat posin, na ol bus, graun na wara bai i no nap bagarap. Kampani i tok aut na stret olsem ol pipol i mas noken poret na tingting tumas long ol kusait toktok bilong ol giaman lain olsem on NGO.

Displa paip em Ramu NiCo i tok i gat bikipela laip o sans long bai i stap strong moa yet inap long 20-pla krismas na go moa yet.



Ol wokman i stat wok long graun bruk long hap bilong Kawawar asples.



Paipplain wantaim sain soim olsem paip i silip antap long graun.



Maski long nait, sain mak i kamap klia bilong ol kar driva long lukim.



Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikipela wok konstraksen long namba tu hap bilong 2008. I kam inap nau, olgeta bikipela konstraksen wok long Krumbukari main sait na Basamuk rifaineri i pinis, na projek i stap redi long kisim komisanim o tok orait long mekim wok. Long wol tu, dispela kain hariap sanapim em i no kamap bipo long wanpela kain bikipela projek olsem, na i daunim olgeta

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 bilian kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil bilding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

**Wanpela
Ramu NiCo,
Wanpela
Komuniti**



TROMOI: Wanpela pilaia bilong University and 20 tim i tromoi bal bipo long ol birua bilong em bilong Kone Sharks i pasim em long Mosbi Ragbi Yunion gem bilong ol las wik Sande long Murray bbareks.




BIKNEM: Ol PNG etlits bilong bipo na nau, Peter Pulu (lephan), Mowen Boino, Toea Wisil na Sandy Katusale i bung wantaim long amamasim 50 yia bilong etletiks insait long PNG, Mas 12 long Mosbi. *POTO: APNG.*



SINDAUN: Stanley Nandex (lephan) na Robert Kopaol i kamap long wanpela bung las wik long tok olsem muvi projek bilong Nandex bai wet bihain long PNG ileksen. *POTO: KB-1 Promotions.*



SANAP WANTAIM: Ol PNG Kundus i sekim ol samting bilong ol we BSP benk i givim ol las wik Fonde long Mosbi. BSP kamap olsem mama sponsa bilong ol i go long Nesens kap salens long Honiara. *POTO: Andrew Molen.*



Kymy Rapilla em wanpela long ol pilaia bilong ragbi sevens tim bilong ol meri bilong PNG husat i kamapim strongpela gem bilong tim long wanpela intanesenel gem bilong ol dispela yia..

TOKSAVE: Salim ol spots dro bilong yu kam long Feks; 325 2579, e-mel;amolen@wantok.com.pg o kam lusim long Wantok Niuspepa opis long Central Waigani, NCD.

Resis long bus



NAMEL long olgeta resis bilong kar, i gat wanpela we i save givim bikpela salens tru long ol draiva na tim bilong ol.

Dispela em "Rally" (reli) resis we ol kar i save resis long wanpela ples i go long narapela, bihainim ol bus rot, wara na maunten wantaim.

Ol rot we ol dispela kar i save resis bihainim, em i ol pablik na praivet rot we ol arapela kar na manmeri no save bihainim long taim bilong dispela pilai kam.

Rot bilong ol em i stap long narapela hap na planti taim ol i mas brukim bus long kamap long dispela ol rot.

Long ol arapela kar resis, ol kar i save raunim wanpela hap tasol i nap wanpela i win, tasol long reli, ol kar i save resis long wanpela ples i go kamap long narapela. Sampela taim, ol i save go pinis long wanpela ples na bihainim statim long hap gen na pinis long narapela hap gen.

I save gat tupela draiva insait long wanwan kar, taim wanpela i draiv bai narapela i malolo na helpim long painim rot bilong ol long go.

Ol kar bilong ol tu i no olsem ol arapela resis kar we ol i mekim bilong ron antap long gutpela rot.

Ol Reli kar em ol i mekim ol long ron long kain kain rot insait long bus olsem na ol bodi, enjin na arapela hap long skin bilong ol tu i strong na i gat planti ol samting bilong helpim ol draiva i painim rot insait long bus na tu ron longpela rot wantaim planti bensin.

Histri bilong gem

Stat bilong reli resis i go bek long 1894 long Paris long Frens we ol kar olsem dispela ol hos i save pulim bipo, i save ron. Dispela resis i pulim planti manmeri long go lukim na sapot na wanpela niuspepa long hap ol i kolim "Le Petit Journal," i sponsaim.

Bihain long dispela, ol arapela resis i kamap we i lukim ol kar i resis long rot long wanpela siti go long narapela siti insait long Frens na arapela hap long Yurop tu.

Long dispela ol resis, ol i kamapim planti ol arapela samting long sait bilong stail na loa bilong pilai we i stap insait long ol gem i kamap bihain na nau tu.

Namba wan bikpela reli resis tru em "Paris-Bordeaux-Paris" resis we i kamap long Jun 1895 na man i winim em Paul Koechlin husat i draivim Peugeot (Pejoh) kar.

Reli resis i go bikpela moa long ol yia i kam na bipo long wol woa, em i bikpela long Amerika tu.

Ol nupela kar i kamap na save na stail bilong draiv tu i go bikpela moa.

Bipo tu, ol i save draivim ol liklik kar tasol insait long dispela resis, tasol nau, i gat reli resis tu bilong ol bikpela kar na moto-baik tu (wilwil).

Dispela resis i save kamap long ol bus rot we i nogat kolta, i pulap long ston, wara, graun malu malu na ais tu.

Em i wanpela gem we i save givim bikpela salens long ol draiva stret.

Stail bilong pilai

Long stap insait long wanpela reli resis, yu mas gat wanpela gutpela kar bilong ron long kain ol rot na ples na gutpela tim long givim sapot na helpim yu.

Ol reli kar i mas strongpela moa long ol arapela resis kar na bodi bilong ol tu i mas

stap antap liklik long graun bilong wanem ol bai no inap ron long gutpela rot.

Insait long ol kar i mas i gat ol strongpela ain olsem ol arapela resis kar, long helpim kar i tanim i go sindaun gut sapos em i kapsait.

Na tu, bai draiva i noken kisim bagarap.

I mas i gat planti wara, bensin, kaikai na redio bilong toktok i go kam wantaim draiva na tim bilong em.

Longpela bilong wanwan resis i bihainim wanem ol ples ol bai ron i go long en.

Wanpela bikpela resis long Saut Amerika, ol i save ron inap 9, 500km long Buenos Aires i go long Lima na tanim i go bek gen. Sapos, ples i longwe tumas, ol i save givim mak we wanwan kar i mas i go kamap long en bipo long san i go daun.

Taim ol i kamap long hap, ol bai kilim kar na silip inap moning bipo ol i ken kirap na ron i go ken long narapela mak.

Ol bai mekim olsem inap ol i kamap long ples ol i makim insait long resis.

Sampela i no longwe tumas olsem tasol rot i ken hat moa.

Reli long PNG

Reli resis em i no nupela long Papua Niugini.

Em i bin stap bipo, we i save lukim ol kar i resis long Hiritano na Magi haiwe, na sampela taim ol i save go antap long Sogeri tu.

Dispela spot i kamap strong long stat bilong 1980's na 1990's tasol em i dai nating long namel.


Em i ken kamap gen tasol wok bilong mekim ol kain resis kar i save kos bikpela mani tru.

Long ronim kain resis tu bai kos bikpela mani olsem na i mas i gat planti sponsa i stap.

Em i no hat long painim ples bilong resis bilong wanem PNG gat planti ol haiwe na rot i stap long ol provins na rurel ples we ol kar i ken i go resis long en.

Ol draiva bai lainim long draiv long kain ol rot nogut olsem na tu long lukautim ol yet long rot taim ol i spit i go kam.

Wanem ol ples dispela resis i go kamap long en tu bai kisim luksave na sampela kain helpim i ken i go long ol tu.



RELI KAR: Wanwan hap bilong wanpela reli kar.



SIT BILONG DRAIVA: Insait bilong wanpela reli kar.



KIRAPIM DAS: Wanpela reli kar i tanim kona insait long resis.



ROT NOGUT: Resis i save kisim ol draiva i go long kain kain rot.

SPOTS DRO
RAUN 12

FRAIDE GEMS: ME 25, 2012



AAMI Park

Storm V^s Broncos



ANZ Stadium

Rabbitohs V^s Raiders

SARERE GEMS: ME 26, 2012



Hunter Stadium

Knights V^s Titans



WIN Jubilee Oval

Dragons V^s Eels

SANDE GEMS: ME 27, 2012



Centrebet Stadium

Panthers V^s Sea Eagles



Campbell town spots Stadium

W/T igers V^s Cowboys

MANDE GEM: ME 28, 2012



Allianz Stadium

Roosters V^s Bulldogs

Bai: Warriors, Sharks

Raun 11 Poins Leda							
Pos	Tim	W	L	D	B	+/-	Pts
1.	Storm	9	1	0	1	175	20
2.	Broncos	7	3	0	1	76	16
3.	Cowboys	7	4	0	0	84	14
4.	Sea Eagles	7	4	0	0	23	14
5.	Sharks	7	4	0	0	13	14
6.	Rabbitohs	6	4	0	1	-10	14
7.	Bulldogs	6	5	0	0	69	12
8.	W/ Tigers	5	5	0	0	-12	12
9.	Warriors	5	6	0	1	-6	10
10.	Knights	4	6	0	1	-19	10
11.	Dragons	5	6	0	0	-24	10
12.	Raiders	4	6	0	1	-27	10
13.	Roosters	5	6	0	0	-60	10
14.	Titans	3	7	0	1	-52	8
15.	Panthers	3	8	0	0	-87	6
16.	Eels	1	9	0	1	-143	4

nrlnius

Maroons opim rot

i kam long bek pes

Ol Blues i luk gut long stat bilong gem taim ol i tromoi bal i go kam na putim namba wan trai bilong ol.

Dispela strong i stap yet we i lukim Farah i go insait long trai lain bilong ol Maroons gen tasol i no bin inap long skoa bilong wanem ol i holim pasim han bilong em.

Ol Maroons i kisim sans long bekim tupela trai taim wanpela pait i kamap na refri rausim Blues senta, Michael Jennings i go long sin bin.

Dispela tupela trai kam long winga Darius Boyd wantaim tupela gutpela kik bilong hap bek, Johnathan Thurston long kisim ol i go pas long hap taim 12-4.

Taim em i kam bek long namba tu hap bilong gem, Jennings i bekim dinau bilong em wantaim wanpela trai long kisim ol i go klostu 10-12.

Wanpela moa trai bilong ol Blues i lus nating taim Brett Stuart i skoa tasol refri tok Sam Thaiday bilong Maroons i tasim bal long trai lain bipo long Stuart i skoa.

Blues i paia gen tasol i no bin inap long stopim ol Maroons husat i kirapim gem bilong ol moa yet long namba tu hap bilong gem.

Olgeta toktok i dai taim senta, Greg Inglis i skoa bilong ol Maroons long 73 minit bilong gem long kisim ol i go 18-10 bihain long kik bilong Thurston.

Blues kepten, Paul Gallen, i tok amamas long hatwok bilong ol pilaia bilong em tasol i sori olsem ol i no winim.

Em i tok ol bai lainim long dispela na traim gen long gem tu.

Maroons fulbek, Billy Slater i tok ol i painim hat liklik long namba wan hap bilong gem tai mol Blues i kam strong insait long gem tasol ol i painim strong bilong ol gen long pasim ol.



PAIT: Pait bruk namel long ol pilaia bihain long wanpela Maroons pilaia i paitim het bilong Blues fowet, Greg Bird wantaim bal.



TRAI: Blues winga, Akuila Uate i putim namba wan trai bilong ol Blues taim em i kisim wanpela gutpela kik i kam long Robbie Farah.



BUNG WANTAIM: OI PNG Kundu pilaia i amamasim nupela sponsa ol i kisim long BSP las wik Fonde. POTO: Andrew Molen.

Davani pilim gut long tim

Andrew Molen i raitim

STRAIKA bilong Papua Niugini Kundus, Reginald Davani, i pilim gut long pilai na i gat bilip tu olsem tim bai mekim gut long Nesens kap salens long Solomon Ailans. Em i bin kisim bagarap long namba wan gem bilong ol insait long Pasifik Gems long Nu Kaledonia long Ogas, 2011 we i lukim em i no bin pilai gen inap long pinis bilong yia. Tasol nau em i orait gen na olgeta strong na spit bilong em long pilai kam bek na em i bilip long kamapim strong gem bilong PNG long Nesen's kap. "Long stat bilong NSL, mi bin kam bek pilai bihain tasol long bagarap bilong mi olsem

na mi wok hat long trening long kisim bek strong bilong mi. "Mi save olsem mi mas stre-tim mi yet sapos mi laik pilai gen long kain bikipela tonamen na i gutpela long lukim olsem mi orait na mi redi nau long pilai," Davani tok. Em i tok tu olsem tim i stap gut na trening bilong ol tu i ron gut tru aninit long kosa Frank Farina. "Ol nupela na olupela pilaia i ron gut wantaim na i gat gutpela wokbung i kamap namel long ol pilaia tu. "Trening i kamap gutpela tru na tim i bung gut wantaim, Frank bai gat sampela wok yet long stretim ol liklik samting tasol olgeta i orait stret," Davani tok. Asisten kosa bilong tim, Wesley Waiwai tu i tok tim i luk

gut na ol i gat gutpela strong na tingting long pilai. "Sampela bilong ol i bin stap long tim i go long Pasifik Gems long Nu Kaledonia tasol planti kam stret long NSL. "Bihain tasol long NSL, mipela i givim ol wanpela wik malolo na bihain kisim ol i go insait long trening kem gen olsem na bodi bilong ol i stap strong yet long pilai," Waiwai tok. Tim i bin stap tripela wik trening long Lae n alas wik ol i kam bek long Mosbi long mekim ol laspela wok redi bipo ol i go long Honiara long pilai. Waiwai tok tu olsem tim bai go long Kwinslen long pilai sampela gem wantaim ol klap long hap bipo ol i go long Solomon Ailans. Davani tu i tok dispela kain ol gem wantaim ol bikipela klap

insait long Australia na arapela hap long wol em i gutpela long helpim tim long kain ol bikipela gem olsem. "I gutpela long go pilaim ol bilong wanem em i save givim nupela kain salens long ol pilaia. "Ol lain long hap i save pilaim narapela kain gem we i strong na spit moa na dispela i ken helpim mipela gut long redi long ol bikipela gem," Davani tok. PNG Kundus i kisim tu bikipela helpim las wik i kam long BSP benk husat i givim ol K50, 000 long go long dispela tonamen. Dispela helpim i mekim BSP i kamap mama sponsa bilong tim na ol bai karim nem bilong benk antap long jesi bilong ol olsem BSP PNG Kundus.

Taim bilong luksave long spots

Andrew Molen i raitim

DISPELA Sarere em taim bilong luksave long sampela ol spotsmanmeri na tim husat i wokhat long 2011. Wanpela man, meri o tim bai kisim wanpela SP Spots awod long amamasim hatwok bilong em insait long spots. I gat 14 awod we olgeta bai resis long en, insait long wanwan resis i gat tripela manmeri stap insait long fainol na wanpela long ol tasol bai winim awod. Presentesen bilong ol awod bai stat wantaim "Sports Media Award of the Year" we i bilong ol niusmanmeri husat i save ripot long spots, na bai pinis wantaim "Sportsman of the Year" awod, we i bilong nambawan spots man bilong dispela yia.

Tripela man husat i stap insait long dispela bikipela resis bilong nambawan spotsman em, Rarua Dikana bilong kriket, Ryan Pini bilong swimming na Jack Viyufa bilong bodibilding. Tasol bipo long ol man i kisim awod bilong ol, Abigail Tere-Apisah (tenis), Dika Toua (weilifting) na Toea Wisil (etletiks) tu bai lukim husat namel long ol bai kisim awod olsem nambawan spotsmeri bilong yia. Resis bilong ol arapela awod tu i strong tru na husat i win i ken amamas long hatwok bilong em. Bosmeri bilong seleksen komiti bilong Spots Awods, Emily Taule i tok, 2011 i bin wanpela bikipela yia gen bilong spots long PNG na ol i kisim 80 nominesen bilong ol manmeri we i kam olgeta hap long kantri.



PNG Lewas i paitim bal long wanpela gem bilong ol long tonamen las wik. POTO: CPNG.

Ol Lewa i lus tasol i no bruk

NESENEL Papua Niugini kriket tim bilong ol meri, ol Lewas, i lus wantaim 8-pela wiket long Siapan long fainol bilong Pepsi ICC EAP trofi sempionsip bilong ol meri long Vanuatu las wik Fraide tasol lewa bilong ol yet i no bruk tumas. Dispela lus i mekim ol i pinis namba tu ples long sempionsip tasol ol i save olsem ol i mekim gut na i lainim planti moa samting tu. Ol i sori olsem ol i no karim trofi kam bek long kantri wan-

taim ol taim ol i kam bek wantaim ol long PNG long Mande dispela wik tasol ol i amamas long ekspiriens na save ol i kisim we bai strongim kriket bilong ol meri insait long kantri. Planti ol pilaia long tim i yangpela tru na ol bai makim kantri planti moa taim bihain. Ol i bin putim gutpela salens tasol bikipela ren long taim bilong pilai tu i no helpim ol tumas. Bipo tasol long gem, bikipela ren i pudaun na ol i wet tupela

SPOT RAUN
WANTAIM
Scott Vavine, ML



Progreem bilong painim ol gutpela pilaia

OLGETA manmeri nau i wok long lukluk long 2015 Pasifik Gems tasol tupela Nesenel Spots Ogenaisesen bilong yumi, PNG Sports Foundation (PNGSF) na PNG Sports Federation and Olympic Committee (PNGSFOC) i wok long painim ol gutpela yangpela manmeri husat i ken pilai gut na makim kantri long dispela bikipela gem. PNGSF i kamapim wanpela progrem ol i kolim "Grassroots to Gold" we i gat bikipela astingting long painim ol nupela na gutpela yangpela spotsmanmeri bilong redi long 2015 gem. Dispela i gutpela tasol i nogat inapt aim long painim ol dispela lain na redim ol gut tru bilong dispela gem, we i kamap klostu pinis. Wanpela gutpela samting em olsem, dispela wok bilong painim ol gutpela yangpela pilaia em i no bilong 2015 Pasifik Gems tasol, em i lukluk tu long ol arapela tonamen na gem we bai kamap long ol yia i kam bihain tu. Dispela progrem i kamap nau na bai stap olgeta taim, bihain long 2015 gems bai em i kisim sapot long surukim wok bilong en i go yet. Insait long 5-yia stretejik plen bilong PNGSF 2013-2017, ol i lukluk tu long wok bilong painim ol gutpela yangpela pilaia long olgeta rijen, provins, distrik na LLG insait long kantri. Dispela bai kamapim wanpela ples bilong olgeta spots long painim na kisim ol manmeri long pilai bilong ol. Bihain long ol i luksave na painim aut ol dispela manmeri, ol bai putim ol i go insait long ol developmen trening progrem long redim ol long ol gem we ol bai stap insait long en. Ol dispela etlit bai kisim gutpela lukaut bai ol i ken kamap namba wan tru long wanwan spot bilong ol. Olgeta spots opisa bai go pas long ronim dispela progrem long wanwan ples ol i stap long en. Progrem bai kamap olgeta hap long kantri long wanwan skul ol i makim long en. Sampela ol tes bai kamap insait long dispela progrem long helpim ol wokman i luksave long ol lain husat i soim gutpela mak bilong pilai wanpela gem. Bihain bai ol i kisim dispela ol pilaia na helpim ol i kamap gutpela moa long spot bilong ol. I mas i gat planti gutpela save manmeri long ronim dispela progrem na tu ol risos olsem ol mani na ol samting bilong wok long lukim em i kamap gut na i go moa yet. Tasol progrem yet bai no inap kamap em yet na wok gut, i mas i gat gutpela wokbung tu i kamap namel long olgeta insait long spots, ol sponsa, gavman na arapela tu. Olgeta stekholda bilong yumi mas givim han long mekim em i kamap gut long olgeta hap bilong dispela kantri. Gavman yet bai go pas long ronim dispela progrem aninit long nem na was bilong PNGSF. Tasol i no gavman wanpela bai givim sapot long en, ol sponsa na husat i ken helpim tu i mass givim han, em i bilong yumi olgeta.

hawa bipo ol i go insait long pilai graun. Ren i mekim na ol i daunim namba bilong ol ova i go daun long 14 tasol. Kosa, Peter Moide i tok ol i no amamas long lus tasol ol lainim planti samting tu na i gat planti wok i stap yet bipo ol i go antap gen long namba wan ples insait long Is Esia na Pasifik rijen. "Mipela i no bin inap long putim gutpela mak bilong ol long ronim na bihain was gut long en. "Tasol ol Siapan i bet na bol gut tu olsem na em i gutpela long ol tasol ol meri bilong mipela i ken lainim planti samting tu long gem bilong Siapan we i ken helpim mipela long bihain taim," Moide i tok. "Mipela i gat planti wok yet long mekim na mipela i save tu long wane mol asua na ol gutpela samting mipela i mekim na mipela bai lukluk long ol," em i tok. Moide i tok planti long ol pilaia bilong em i yangpela yet na krismas bilong ol i no abrusim 20 yet olsem na dispela i gutpela ekspiriens long ol. "Ol i save nau na dispela bai mekim ol i hanger moa long pilai gut na win taim mipela i kam bek long hia bihain taim," em i tok.



Maroons opim rot

Winim gem wan, tupela moa stap.

OL Blues i gat wanpela tingting tasol taim ol i go insait long namba wan stet ov orijin gem bilong ol long Melbourne long Trinde nait, dispela wik.

Dispela tingting em long winim dispela gem na i go moa yet long winim resis long dispela yia tu.

Ol i makim wanpela tim we i gat planti spit long fowet na beklain wantaim.

Astingting em long yusim spit long ronim bal namel long ol Maroons na


traim long brukim banis bilong ol.

Tasol ol Maroons i no sidaun tasol na lusim ol Blues i kam bek na daunim ol.

Ol Blues i paia strong long nmaba wan hap bilong gem tasol ol Maroons i kam bek strong long win 18-10.

Blues i skoa pas long namba 6 minit bilong gem wantaim winga, Akuila Uate husat i kisim bal long wanpela kik i kam long huka, Robbie Farah.

Moa long Pes 30



TAKOL: Blues faiv eit, Todd Carney i bungim strongpela difens bilong Maroons winga, Brent Tate.



All Sport and First Aid requirements.



**P.O.Box 1066 Boroko.
Phone 325 3185. Fax 325 0190.
Email sales@johnstons.com.pg."**